

左文襄公奏稿卷四十二

起同治十一年壬申八月訖十月

目錄

偏攻肅州連克堡壘附城賊蹤一律掃盪摺

懇豁免蒙鹽商人積欠稅銀并擬變通試辦摺

進攻西甯土客各回疊勝摺

西甯官軍連獲大勝片

圍剿肅逆疊獲勝仗摺

通籌全局請調毅軍赴甘助剿摺

請 敕張曜分營駐靈州花馬池一帶片

密陳西甯賊情片

奏稿卷四十二目錄

奇營勇潰自請議處片

請將丁憂提督徐占彪留營帶兵片

懇豁免茶商積欠課銀并擬變通試辦摺

請 敕閩省酌撥輪船經費片

西甯剿匪大捷立解城圍摺

熊隆名請開復原官 賞還勇號片

覆陳河州回眾蠢動情形片

奇營被脅各弁請註銷官階摺

遵 旨另籌調度摺

偏攻肅州疊獲全勝摺



河南協餉請改爲毅軍運費片

圍剿肅逆擊退撲營悍賊并添兵助攻摺

西甯解圍後辦理情形片

涼州白楊墩湖剿賊獲勝片

武職大員苛斂捐輸誣民爲逆縱兵攻堡請 旨察辦摺

總兵魏紀盞等招撫零匪被害請 卹片

偏攻肅州連克堡壘附城賊蹤一律掃盪摺

同治十一年八月初一日會甯夏將軍穆

圖善

奏爲官軍偏攻肅州連克枯樹四壩北崖頭各壘卡并力拔朱家堡堅巢附城賊蹤一律掃盪情形恭摺馳陳仰祈

聖鑒事竊提督徐占彪六月十五日以前戰事

臣

等已於七月十

四日由驛馳陳在案查附城賊巢自塔爾灣黃草壩等處攻克後惟城東朱家堡牆堅濠深賊恃以爲固又城北北崖頭城南枯樹城東南四壩等處墩堡環峙徐占彪已率隊繞紮肅城西南而雷護運道及雷紮三仙洞各營遠在城東若枯樹及四壩地方不卽攻拔則兩路官軍終虞隔閡六月十七日徐占彪飭正營進紮校

奏稿卷四十二

一

場以東適城逆數百出南城刈麥密飭馬隊繞城根截其歸路朱家堡及枯樹各堡賊出隊爲援徐占彪親出擊敗之其刈麥者亦逃入枯樹堡追斬數十名擒六名盡奪其牲畜麥捆城卡槍礮攢發官軍亦有傷亡徐占彪詳審地勢枯樹三堡六墩負城設險必繞城濠以襲其後遂親挑奮勇百二十名夜率以行仍列隊河灘作勢仰攻并調開花礮向堡轟擊賊憑牆以禦徐占彪已繞伏城濠以洋礮測準擊登陴者守賊應聲而倒餘賊驚潰各墩堡同時竄逸夜黑未及窮追遂移營填紮其堡獲槍械多件二十一日偵報賊出東門繞竄東南料必赴塔爾灣搶收餘麥率馬隊追及之賊捆載將行見兵至驚走追斬數十名奪驢騾數百匹四壩麥穗

黃熟該處賊堡凡十一緊連朱家堡二十一日飭新左新中及三四起馬隊繞東關濠邊撲入兼堵朱家堡援賊飭正右歸化及呼敦右營攻其南徐占彪率副將桂錫楨護開花礮隊馳入壩中左右轟擊又令副新後兩營由三仙洞橫攻各堡自卯至午副新後兩營先破東大堡一座餘堡各賊奪門四竄追斬極多旋移軍紮入加築木城所遺三仙洞營壘以團勇填紮自是東西兩路各營始聯成一氣是夜新後營又襲破雷臺廟東面大墩黎明瞥見西廢堡有踞賊遣馬隊擊走之二十四日城逆馬四具稟請退兵十里願獻城自贖徐占彪稔其詐不允攻朱家堡益急於該堡南北各紮營卡斷其運糧及出汲之路閱一晝夜工竣賊益洶懼二十

五日各營備攻具填濠齊進徑薄賊牆賊棄堡狂奔追殺極多獲大礮一尊軍械無算調右營進紮該堡自是肅城東西南三面賊壘盡矣惟北崖頭有廢堡尙爲賊踞二十九日徐占彪率隊馳往賊虜聚麥地且刈且縛曳以牛車官軍擊之賊潰遂焚其麥復偪追竄賊賊入廢堡中憑牆放槍徐占彪坐馬受傷棄馬步戰弁丁益奮立將此堡攻克餘堡之賊亦悉數擒斬於是附城概無賊壘七月初一日徐占彪率隊歷北稍門至西門賊惟憑牆施放槍礮誘之不出遙見西北山邊有賊刈麥揮隊搜殺斃賊數十名據獲賊供稱萬長馬行五已爲官軍所斬歸歷塔爾灣遇有刈麥零賊盡殲之城賊終不復出初二日復出隊徧歷各壩迄無賊蹤撤隊

後城逆遠以三四百名出東門割城根餘麥桂錫楨回軍馳擊殲悍賊多名餘悉滾濠鳧水而逸此六月十七日起至七月初二日止徐占彪屢獲全勝攻克朱家堡堅巢埽濫附城賊壘之實在情形也臣維肅逆狡黠異常環城築壘爲負隅之勢徐占彪提軍深入由西南橫埽而東而北奮迅無前所有附近堡寨墩卡悉數蕩平肅城孤立該將弁苦戰之功自應量乞

恩施以昭激勸升用提督蕭章林遇缺題補總兵李登第蘇洪勝均請以提督補用并

賞給勇號補用副將蕃勇巴圖魯宋賢聲儘先副將李占雄雷大興張邦銀均請以總兵補用宋賢聲并

奏稿卷四十二

賞換清字勇號李占雄雷大興張邦銀并

賞給勇號副將銜參將胡正魁陳得勝均請以副將儘先補用并賞加總兵銜花翎遊擊馬良驥請以參將儘先補用并

賞加副將銜花翎都司阮玉超趙洪勝吳完品均請以遊擊儘先補用花翎守備李得宜請免補都司以遊擊補用藍翎守備劉殿邦朱全龍羅平安鄧洪貴儘先守備李生財李登榮吳魁盛李貴芳均請以都司儘先補用劉殿邦朱全龍羅平安鄧洪貴并

賞換花翎李生財李登榮吳魁盛李貴芳并

賞戴藍翎藍翎千總黃均廷熊飛鵬任萬斌張青山楊世太吳源陞均請以守備儘先補用并

賞換花翎藍翎河南撫標拔補千總劉合春請以守備仍歸河南撫標補用并

賞換花翎儘先千總趙應彪請以守備儘先補用并

賞戴藍翎把總劉和順蔣聯升陸照美均請免補千總以守備儘先補用并

賞戴藍翎藍翎把總楊世榮李萬清均請免補千總以守備儘先補用軍功牛全勝任洪度劉世東楊生寶冶士俊均請免補外委以把總儘先補用所有原稟擬保各文員均俟肅州克復後核明實在勞績彙案請保庶足以作士氣而勵軍心謹合詞具陳伏乞皇太后

奏稿卷四十二

四

皇上聖鑒訓示施行謹 奏

同治十一年八月十一日內閣奉

上諭左宗棠穆圖善奏官軍偪攻肅城連克賊壘一摺肅州賊匪自塔爾灣黃草壩攻克後惟恃朱家堡等處賊巢堅固負隅抗拒見經徐占彪督率兵勇由西南轉戰東北立將肅城附近賊堡悉數蕩平賊勢已孤剿辦尙爲得手在事出力各員自應量予獎勵升用提督蕭章林等均著以提督補用蕭章林并賞給才勇巴圖魯名號李登第并賞給匡勇巴圖魯名號蘇洪勝并賞給勵勇巴圖魯名號副將宋賢聲等均著以總兵補用宋賢聲并賞換綳僧額巴圖魯名號李占雄并賞給育勇巴圖魯名號雷大興并賞給

績勇巴圖魯名號張邦銀并賞給俊勇巴圖魯名號參將胡正魁等均著以副將儘先補用并賞加總兵銜遊擊馬良驥著以參將儘先補用并賞加副將銜都司阮玉超等均著以遊擊儘先補用守備李得宜著免補都司以遊擊補用劉殿邦等均著以都司儘先補用劉殿邦等四員并賞換花翎李生財等四員并賞戴藍翎千總黃均廷等均著以守備儘先補用并賞換花翎千總劉合春著以守備仍歸河南撫標補用并賞換花翎趙應彪著以守備儘先補用并賞戴藍翎把總劉和順等均著免補千總以守備儘先補用并賞戴藍翎楊世榮等均著免補千總以守備儘先補用軍功牛全勝等均著免補外委以把總儘先補用該部知道欽此

軍機大臣字寄同治十一年八月十一日奉

上諭左宗棠穆圖善奏官軍偪攻肅州連克賊壘一摺徐占彪一軍攻剿肅州逆匪疊克枯樹四壩北崖頭各壘卡及朱家堡堅巢附城賊蹤一律掃盪辦理尙屬得手本日業經明降諭旨將出力各員照所請獎勵矣肅州之賊疊經懲創自己勢孤膽落著左宗棠等檄飭徐占彪乘此聲威穩慎進取以期力拔堅城毋得輕率受撫致爲賊匪所紿至成祿一軍久駐高臺尙無行期疊據奏稱車馬糧石均形缺乏此軍雖難期得力然使因糧缺譁潰必致貽患地方左宗棠務當飭令甘涼安肅二道妥籌接濟不得稍存膜視將來此軍進止朝廷別有權衡也將此由五百里各諭令知之

奏稿卷四十二

六

欽此

懇豁免蒙鹽商人積欠稅銀并擬變通試辦摺

同治十一年八月十七日

奏爲蒙鹽商人積欠歷年稅銀無力交納懇

恩豁免并擬變通試辦章程恭摺仰祈

聖鑒事竊查阿拉善地方向產食鹽咸豐八年經前督臣樂斌奏請改私爲官抽收商稅以充兵餉隨經酌擬定章每歲共完稅銀一萬六千兩分期交納指定行銷地界公舉商人張永泰張公遠充當商首分住省城及秦州總理稽查按限交稅銀各八千兩仍由住省商人張永泰彙解司庫備撥兵餉按年清解并未拖欠迨同治元年陝甘軍興以來道路梗塞鹽運滯銷稅課遂積欠至二萬數千兩五年經前督臣楊岳斌奏請暫行緩徵奉

奏稿卷四十二

七

旨交部核議經戶部議准咨行在案惟地方軍務未平從前存鹽之所如一條山五方寺地當賊衝頻年被賊掠擾居民流亡舊商資本蕩然轉徙流離杳無蹤迹遂致徵無可徵前據署蘭州道蔣凝學詳報一條山五方寺兩處查有商人張永泰遺贖蒙鹽水於等項請派員在該處變價充餉陸續收獲銀二萬五千七百餘兩尙存鹽斤約可值銀三千兩有奇除抵欠稅外積欠尙鉅舊商既無從追繳擬招新商接充而新商均以舊商欠款未清恐干賠累裹足不前臣飭司道會議變通行鹽章程期收實效據藩司崇保前署蘭州道升任山西臬司蔣凝學酌議四條具詳前來并請將張永泰等遞年欠稅銀一十三萬三千餘兩一併豁免等情詳請

具奏臣維行銷蒙鹽之策必先清引地於漳鹽庶無窒礙必另開官店於商販庶易流通他如減釐稅以恤邊民設局卡以杜繞越均爲目前要務該司道所擬尙中窾要至張永泰等積欠之款實因匪擾所致與尋常商欠不同合無仰懇

天恩將該商等積欠銀兩概予豁免俾新商得以劃清界限承完新稅免賠舊欠以廣招徠并請

俯允暫照所議章程先行試辦以濟急用如有應行增減各事宜容臣隨時陳明以期周密除將條議恭繕清單進呈

御覽并鈔咨部科外謹將蒙鹽商人積欠稅銀請免追繳并擬變通試辦緣由恭摺具陳伏乞

奏稿卷四十二

八

皇太后

皇上聖鑒訓示施行謹 奏

謹將辦理蒙鹽章程條議恭呈

御覽

一蒙鹽宜與漳鹽先清界限也甘省向有額設鹽引商人按年納課至蒙古湖鹽定例祇准蒙民沿邊易換口糧并無額設之引亦無應徵之課迨前督臣樂斌奏定收交稅銀卽議蒙民馱鹽進口祇准從一條山五方寺至畢蘭靖遠條城經安定會甯隴西甯遠秦州轉運漢南一帶銷售原恐侵及漳鹽引地查湖鹽較漳鹽爲佳今漳鹽已經甘南稅釐局議定課釐并收若令蒙鹽於甘境隨

處銷售誠恐居民祇擇其鹽之佳者買之轉覺有礙漳鹽引課漳鹽之釐不免減色茲擬蒙鹽發運之路仍照舊章辦理不准奸商私繞小路侵銷別境則既於引課無礙而蒙漳兩鹽之利亦藉以兼收

一蒙鹽請仍開設官店以通商販也自咸豐八年前督臣樂斌奏准蒙鹽化私爲官後卽經商人張永泰等遵照奏案領帖開設官鹽店收買蒙鹽同治初年甘肅軍興賊氛日熾鹽店化爲烏有見在北路已通應仍覓商人試辦照依甘南稅釐章程承領牙帖聽其開設官店買賣蒙鹽從前商人領過之帖卽令繳銷

一蒙鹽稅釐宜較漳鹽稍減以恤邊民也查見定南路漳鹽章程

奏稿卷四十二

九

每斤課釐并收十文此項蒙鹽向無引課本係邊民易換口糧藉以營生若比照有引之鹽每斤收錢十文則商人買鹽時必藉口抑勒蒙古賤售不免有礙邊民生計應請每鹽百斤收稅銀八分抽釐銀八分稅由官鹽店總商交納釐由轉鹽之商民交納概與蒙民無干查承平時蒙鹽入口每歲不下五六萬駝每駝二百四五十斤按百斤八分抽收釐稅歲可收銀二萬餘兩雖較引鹽課釐爲少而合之原定商交之一萬六千兩尙多其稅釐各局均請刊發三連印票註明某戶發鹽若干斤應交稅釐銀若干兩票內蓋用省城稅釐總局鈐記一發商人收執一存本局核對票根齋總局備查此票於蒙鹽經過州縣局卡一體印發由各處印委各

員按月將有無收過稅釐正項罰款造報連票根齎送總局稽考
由總局按月核明彙齊詳核并移藩司備案印票將次用完印委
各員先期備文赴總局請領

一設立局卡委員稽查也蒙鹽經過州縣除省城有稅釐總局甘
南有鹽釐總局安定見亦添設釐局應歸併辦理毋庸另設局卡
以節糜費外應於鹽商開店之處設一稅局再於條城設一釐局
各派委員一名書識一名巡欄四名稅局俟官鹽店轉發鹽斤時
先向鹽商收稅一次運鹽商民路過各局再由局抽釐一次如由
官店發鹽先到條城卽由條局抽釐或不由條城經過先到省城
卽由省城釐金總局抽釐前局已抽釐者後過之局祇應驗票較

奏稿卷四十二

十一

對斤重立即放行不得再抽釐金或後過之局所較鹽斤浮於前
局票開數目卽係奸商夾帶應以浮冒之數按釐金加十倍示罰
仍由後局添發釐票註明增添斤數示罰緣由以備再過之局查
考其靖遠會甯隴西甯遠未設專局者責成各地方官兼司稽查
如有漏未交釐或鹽多而所執交釐之票鹽數較少悉照各局章
程辦理再檢查前卷蒙鹽定稅之後每有奸徒繞越行走如察漢
布魯亦爲蒙古產鹽之區該處距中衛較近或由鹽茶之新營里
會甯之郭城驛直達南路又由皋靖運鹽或繞行狄道之官堡通
渭之馬營監囤積轉賣非多設巡卡無所稽查應由中衛鹽茶狄
道通渭馬營監各廳州縣并局員一體認真巡查如有并無稅票

釐票繞由各該處行走者查出悉照所定稅釐銀數加十倍抽收以杜取巧而示懲罰

以上四條擬由蘭州道先行招募新商暫行試辦如察有未盡事宜仍隨時核明具奏併咨戶部核議遵行

進攻西甯土客各回疊勝摺

同治十一年九月十九日會銜

奏爲官軍進攻西甯剿辦土客各回疊獲全勝恭摺陳仰祈

聖鑒事竊照西甯土客各回疊次求撫各繳馬械

臣

均飭道員馮

邦棟隨時驗收惟察所繳馬械多不適用馮邦棟催令悉數呈繳

客回藉故遲延土回則以客回擾害不能不稍畱馬械准備抵禦

爲詞

臣

飭暫緩呈繳先將存畱馬械造冊申齎俟客回事定再繳

一面飭三品卿銜道員劉錦棠提督何作霖等率馬步各營分起

前進比劉錦棠等於七月二十及八月初一等日先後行次碾伯

初七日各土回目續繳馬械到營馬疲械鈍與前無異仍具結稱

限半月內全繳并允辦軍糧惟求官軍緩進蓋以西甯收穫之期

奏稿卷四十二

三

約在九月初旬也劉錦棠以回情多詐收穫後恐彼飽我飢辦理
費手又慮地氣早寒一經凝凍則營壘均難修築遂出示曉諭土
回安堵無恐以便直擣陝回巢穴畱直隸州知州龍錫慶所部綏
定營紮七里鋪親率馬步進紮平戎驛該處地勢平闊逼近陝回
所踞之大小南川并分兵聯紮馬營灣及三十里鋪距西甯府城
三十里與小峽口毗連察看沿途土回堡寨僅畱壯丁待收穫餘
均潛逃劉錦棠謂其有異飭所部毋犯秋毫致有藉口初十日提
督余虎恩率隊入觀音堂溝放水土回聞槍抗拒傷勇丁二名十
一日劉錦棠率馬隊至峽口周覽地勢突見堡中出馬步百餘賊
施放槍礮弁勇受傷者三名官軍舉槍還擊斃賊數名賊遁十二

日馬營灣各營瞥見馬步賊千餘由山頂繞至檢柴溝劉錦棠當
飭提督譚上連遊擊董福祥都司張俊李雙良等由左路登山邀
擊提督陶生林遊擊熊隆名率馬隊沿溝列陣山險路窄該逆排
列峰巔恃險穩拒劉錦棠揮軍分隊上山立斃悍賊數名該逆滾
溝而遁掩殺三四十名生擒一名追及紅水溝而返是日另有馬
步悍賊二千餘由府城而來竟奔峽口撲近三十里鋪營盤湟河
北岸亦有賊數百隔河吶喊助勢何作霖因修壘未成僅調洋礮
隊出伏破屋及山溝內向賊轟擊該逆見大隊未出又恃紅水溝
之賊已繞及後路遂愈撲愈近何作霖俟其攻撲逾時氣已衰竭
整隊猛出擊之該逆驚潰追斬數十名擒四名奪獲叉子槍十餘

奏稿卷四十二

三

杆追過山原數重始行收隊訊據擒賊供稱紅水溝之賊係白彥
虎馬鎮國畢大才等逆峽口一帶之賊係禹得彥崔三等逆內均
雜有西甯土回劉錦棠計該逆既糾股出敵決不遽回老巢預飭
余虎恩等分伏馬營灣各山岔復飭提督譚和義蘇大勝及熊隆
名等由馬營灣渡湟擊峽口北山之賊又調陶生林李雙良張俊
等赴三十里鋪助剿十三日該逆果率大股三四千分布峽口南
北兩山馬賊繞至峽東各營仍照常築壘陶生林等先後齊集遂
飭何作霖等衝撲峽口張俊李雙良等分起仰攻南山陶生林由
山溝抄賊後該逆已先於夜間在峽中砌石卡二座憑卡放槍南
山之賊亦憑險死拒槍礮如雨血戰逾兩時譚和義等已渡湟馳

上北山立將山頂踞逆擊散斬馘二十餘名徑趨峽口以西陶生林亦從溝內抄出南山之南賊乃大潰何作霖乘勝衝入峽內攻破石卡卡賊數百殲斬及自盡無一脫者生擒禹逆所部頭目李金良奪戰馬十餘匹叉子槍四十餘枝刀矛無算是日有馬步賊數百由紅水溝迤邐而出遇伏驚竄余虎恩等分路追擊斃賊亦多十四日馬賊百餘循馬營灣山溝出竄提督譚慎典追斬數名十五日有馬步賊在小峽口山頭吶喊何作霖等調洋礮隊仰轟之賊遁十六日零賊數百由巴藏溝出提督羅照陞擊走之十七日諜稱平戎西高疆溝口卓子山有賊乘夜修壘并有入股賊在溝屯聚當率馬步馳抵高疆遙見山巔堅壘已成溝內有土回空

奏稿卷四十二

古

堡五座仍爲賊踞各山頭賊旂林立眾約五六千當飭陶生林余虎恩等由左路入溝擊踞堡之賊飭譚和義等由中路登山徑攻賊壘熊隆名李雙良由右路擊各山援賊弁丁奮躍直前賊憑堡穩抗山上之賊復併力下援陶生林熊隆名等揮軍合擊鏖戰逾時斃悍賊無數山上賊先潰堡中各賊亦奪門逃竄踞壘之賊遂齊隊衝出譚和義等截之復縮退入壘各路敗賊又麇聚回援陶生林譚上連等分路堵擊自辰至酉賊始敗奔各營會攻山壘壘賊槍石并發急攻不下時已昏暮劉錦棠督軍露宿環攻五鼓時霜風凜冽該逆趁月光陰翳時由壘西峻壁滾身潛遁追斬數十名其墮折手足及自盡與受傷者甚眾獲馬數十匹槍矛數百件

是日另股賊約數千出峽口攻何作霖營盤何作霖及提督尹興
茂席大成等力戰卻之十八日騎賊二三百渡湟擾馬營一帶經
何作霖擊退十九日飭李雙良分哨紮平戎以西大股賊仍由高
疆溝口而出劉錦棠揮軍分三路進擊賊知不敵仍退縮入溝追
斬數名賊且戰且退官軍結方陣追之直擣高家堡高家堡卽逆
首白彥虎行巢也白逆噉眾返鬪官軍如牆而進刀斫矛刺殲悍
賊百餘賊棄巢狂奔官軍焚其巢而返是日有步賊二千餘出峽
口撲攻何作霖營壘復有騎賊由北岸渡湟抄出壘後勢甚兇悍
何作霖堅守不出及午賊氣已衰官軍開壁齊出尹興茂扼其前
何作霖及席大成繞壘後包抄又分哨先堵渡口馬賊倉猝搶渡
中流沈溺數十名渡河不及者悉被截殺而奪其馬壘前之賊亦
負創而遁二十一日劉錦棠督軍在馬營灣修壘聞峽口礮聲又
見馬賊數百已由何作霖壘後徑繞至上紅莊一帶密飭陶生林
等率馬隊分伏廢堡步隊修築如常馬賊漸偪新營見只步隊修
築營盤遂放膽進撲忽陶生林等馬隊由廢堡躍出步隊合力夾
攻該逆奔逃不及立斬多名其鳧水淹沒者不計其數落後者悉
數擒獲劉錦棠分兵扼河親率熊隆名董福祥等馳赴峽口何作
霖等鏖戰已久見援兵大至奮威猛撲各營繼之賊乃大敗山頂
尚有賊數百放槍助勢熊隆名等下馬步戰斬馘遂多餘逆滾溝
而逸是日白彥虎率騎賊出高疆溝撲分哨之壘李雙良憑牆力

禦槍斃悍逆多名余虎恩聞警赴援賊敗退計自進兵以來無日不戰其中苦戰如十七十九二十一二十三等日尤於至險之中克獲奇捷計先後斬馘生擒已千數百名溺斃受傷者不知其數十九高疆溝之戰礮斃紅衣賊目據擒賊供卽首逆白彥虎夥內總目馬大賊中所推六元帥兇悍最著者也此外陣斃紅衣悍目尙多其名姓不可得詳二十三日之戰首逆禹得彥聞亦帶傷自此兇燄亦當稍減惟劉錦棠所部除畱駐靈州金積堡一帶僅馬步十四營臣分隸以龍錫慶步隊兩營熊隆名陶生林馬隊兩營尙止馬步十八營而自碾伯紮至小峽口計程八十餘里山路歧雜見在土回與客回聯成一片每戰則彌山塞谷四出撓我殊有應接不暇之勢又所需軍糧子藥運至前敵各營均須派隊往來護送時有戰事兵力屢分而見單幸官軍皆百戰之餘劉錦棠又敏銳善戰故能履險如夷臣見擬調提督劉明燈率馬步六營駐碾伯之西南專司護運俾得壹意進取毋憂後顧如兵力足敷則繞由威遠鎮出奇兵卽轉其糧以餉軍尤爲全算臣自當慎以圖之各戰傷亡員弁勇丁俟查明彙請

優卹謹會同西甯辦事大臣豫師合詞陳奏伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十二

七

西甯官軍連獲大勝片

同治十一年九月十九日

再正拜摺間適接劉錦棠稟報八月二十四至九月初四日剿賊連獲大勝先後斃賊共二千餘名二十七日礮子洞穿首逆白彥虎左乳當經逆眾搶回南川賊巢二十九日首逆馬桂源之弟馬眞源在小峽力抗官軍亦被礮子洞中右肋其撒拉五工助逆回目多拜已經官軍陣斬撒拉逆回亦遁回五工據生擒西甯逆目馬仲供如此并探得九月初六日劉錦棠已踏破觀音堂一帶賊壘機勢甚利所有詳細情形容俟查明續報謹附片陳明以慰聖懷謹 奏

軍機大臣奉

奏稿卷四十二

支

旨知道了欽此

圍剿肅逆疊獲勝仗摺

同治十一年九月十九日

奏爲官軍圍剿肅逆疊獲勝仗恭摺馳陳仰祈

聖鑒事竊提督徐占彪偪攻肅州七月初二日以前戰事已經馳陳在案肅城外土地沃衍又值雨澤優霑禾稼豐茂徐占彪調團民收割以官兵護之計旬日間得糧數千石初十日城逆馬七馬得鎮等款營乞撫徐占彪知其爲緩攻計也姑漫應之密覘該逆數百成羣日夜收糧割草往來不息十九日率馬步繞城巡視瞥見南城外劉家空堡二座復有賊千餘據其中又朱家堡北舊墩三座亦各踞賊百餘見官軍至卽施放槍礮官軍掩殺堡外零賊十餘名餘仍縮退二十日率各營分攻三墩城逆以二千餘援前

奏稿卷四十二

九

墩提督陳春萬擊卻之回軍圍攻賊已棄墩而逸有另股援中後二墩總兵黃祖福等禦之徐占彪揮親兵攻中墩破之守備孫三級躍上牆垣手刃千長楊逆及悍黨十餘名身受七傷力竭而殞是夜千總藍明泰襲破後墩守賊鮮有脫者二十一日遊擊徐春先等夜攻劉家堡出賊不意以火器拋入賊奪門而走官軍伏暗中擊以槍礮轟斃甚多二堡旣克官軍卽填紮之二十二日陝回王萬有等以城逆發糧日減且與歸化營回勇半屬親故遂以二百餘騎至歸化營請降願剿賊自贖徐占彪允之委歸化營營官千總藍明泰管帶合紮二十四日城逆數百自北門出飭各馬隊追擊之斬賊多名擒八名新收回勇接戰尤力傷亡亦數名月杪

秋糧繼熟賊每乘夜潛出收穫遂派正新後兩營分哨紮城西大路三十日徐占彪率隊赴塔爾灣一帶搜剿行次黃草壩見賊約四五百正在搶穫揮軍擊之斃賊數十名擒八名盡奪其牲畜糧束餘逆狂竄回城再抵塔爾灣又遇收糧賊三百餘載糧回城見兵而潰擊殺數十名擒二名餘逆亦盡棄牲畜逃匿空堡八月初一日徐占彪以無兵可增乃分所部馬步一營爲兩營環城聯紮距城僅一里半里不等各相間里許自城西迤邐而南又繞城東迤北城角僅餘北門一面未克合圍正修壘間城逆由南門出賊千餘西衝新左新中等營東門亦出賊千餘撲歸化等營當飛飭附營馬步左右抄之兩路之賊均敗伏濠沿以蔽槍礮城上開槍

奏稿卷四十二

三

礮助拒徐占彪調副將蕭蘭玉赴正營守備李道修赴左營各以開花礮對城轟擊子落城內極多人聲鼎沸又密調劈山礮隊排指東南兩門一面傳令各營收隊伏濠之賊見官軍收隊急趨入城官軍劈山礮隊一齊轟發賊應聲倒斃奪門入自相蹂踐屍骸枕藉初二日辰刻悍賊三四千出北門圍攻歸化兩營甚急徐占彪飭馬隊繞後擊之抽正副新後各營截其歸路餘營排列東南城下賊正與歸化兩營相持馬隊馳至兩面夾擊賊敗退城下而歸路又爲官軍抄截不能避匿濠中遂折向東路鼠竄而遁各營排礮轟擊槍子雨注斃賊約數百名其分匿東南濠沿者聞槍外拒城上亦開礮助之對轟竟日始收隊初三日馬賊二名遞呈乞

撫北門旋出賊六七百循城東下希圖收屍當派總兵齊懷松等截其後賊抵死鏖戰馬隊亦從旁抄至殲賊甚多餘賊伏匿濠中官軍撤隊始遁竄回城初四日大股賊出北門分四股每股約千餘人一循濠而東至副營前排偪濠沿一圍攻歸化右營一由四壩北面繞出歸化營後一列隊城東北徐占彪當飭徐春先禦副營前之賊飭陳春萬黃祖福由四壩攻賊後飭總兵陳登雲出四壩以東抄之馬隊往來爲援副營前之賊拚死猛撲不少卻徐占彪親率馬隊由左路橫衝賊隊徐春先亦由右路截之斃悍逆數十名賊始退紮北城角與列隊城下之賊合爲一起李道修以開花礮向城擊之堞口應聲崩裂磚石飛擲城下賊受傷甚多悉奔

奏稿卷四十二

三

匿城濠徐占彪折馳四壩陳春萬正與賊戰賊伏溝坎槍礮不能及城上護以槍礮勢難偪攻乃飭蕭蘭玉以開花礮轟其城樓擊塌樓檐一角傷賊多名伏溝之賊亦驚起向四壩奔逸其圍攻歸化營之賊填濠攀堞偪攻甚猛徐春先等援之賊分隊抵禦千總郭三超怒馬斫陣直擣中堅馬隊相繼衝入藍明泰亦開壁夾攻斃賊百餘名奪槍械鋏鋤百餘件餘賊敗奔北門惟四壩潰賊未及入城城中馬賊五六百由北崖頭迎護陳春萬黃祖福率師要擊殲賊百餘名獲旂械多件初五日飭副將桂錫楨移紮北崖頭斷其出路收糧之賊千餘未能入城者均西竄出關又據逃出難民供稱連日之戰賊中傷亡千萬長十五名阿渾三名此七月十

九至八月初五日圍鞏肅逆壘獲勝仗之實在情形也臣維肅州
回逆恃其濠深城堅槍礮層疊爲負隅久抗之計見將城外新麥
刈穫過半賊中糧食無多援賊無裹糧趨附之理是不擊援賊而
援自絕也如此時有勁旅十數營布紮北門一面多昇攻具晝夜
轟之堅城計可速拔惟兵力未能遽合長圍慮賊鋌走出關又成
不了之局見在秋令已深計逾九月則冰雪凝沍不能遁出關外
屆時自當察看情形妥籌辦理所有八月初五日以前鞏辦情形
理合據稟馳奏伏乞

皇太后

皇上聖鑒訓示謹 奏

奏稿卷四十二

三

軍機大臣奉

旨另有旨欽此

通籌全局請調毅軍赴甘助剿摺

同治十一年九月十九日

奏爲通籌甘肅全局請調湖南提督宋慶全軍赴甘助剿以資分
布而速戡定恭摺馳陳仰祈

聖鑒事竊臣自移駐省城後與穆圖善商議軍務一面籌議募補
標營兵丁精心訓練以實行伍爲異時撤減客軍弁勇之計其時
并不知穆圖善有赴陝之

命也七月二十七日欽奉

諭旨穆圖善交御省防原應卽赴本任以重職守第甯夏見尙安
謐且有張曜所部駐紮足資鎮攝陝西爲甘軍後路糧餉所關此
時南北兩路時虞零匪竄擾且新撫回眾分別安插之處均距陝

奏稿卷四十二

重

界匪遙非得力隊伍扼紮要隘懾以聲威不足戢犬羊反覆之性
著該將軍於左宗棠進省將所辦防務分晰移交後統帶所部馬
隊并挑選步隊率以東行在陝西乾邠一帶擇要扼紮妥籌防剿
以副委任穆圖善所部分布近省各要隘尙稱得力左宗棠到省
後派兵接防是否足敷分布儻不敷扼紮卽可將該將軍所部酌
量畱防著與穆圖善妥籌辦理穆圖善應俟該大臣布置妥協後
再行拔隊東進等因欽此仰見

聖懷垂念邊疆無微不至欽感難名

臣奉到

諭旨與穆圖善悉心商議穆圖善擬以所部除附省及分駐金縣
之河鎮營步隊二千一百餘名駐平番縣之南字營八百人馬隊

一百騎畱於甘肅其由省城北三十里火燒巖至土門止共四百七十五里穆圖善分紮馬步八營原以保秦王川糧源護運道而通涼甘兩郡及肅州關外文報之路最爲衝要議候臣調營分起填紮乃可拔隊東行臣比以甘南一路漸就安謐統領奇捷營降補參將楊世俊所部馬隊四營步隊兩營尙堪調撥當飭楊世俊迅帶青旂馬隊一營及捷勇步隊兩營由狄道沙泥赴省其分紮各處之紅旂白旂藍旂馬隊各營先後調至馬營監取齊由安定赴省八月十八日楊世俊到省正商令前進填紮間忽接安定防營前路統領記名提督劉端冕飛稟紅白藍各營馬隊行至馬營監次早開拔忽鼓譟夥潰倡逃各犯持刀斷路迫眾東行營哨各

奏稿卷四十二

十四

官倉卒訶禁不止馬勇有抵格受傷者有隨同奔竄者比經派隊馳往接護未潰隊伍一面追截潰卒楊世俊聞報卽請前往撫諭臣飭就便將未潰隊伍交原帶營哨各官帶赴蘭州點驗共計三百七十六騎失馬勇五十餘名據總兵楊德俊等稟報倡潰弁丁係五隊領旂把總王錦如三隊領旂守備路鍾宇紅旂右哨哨長遊擊銜都司呂長樂後哨哨長把總張志才都司馮高山白旂副哨長把總楊富貴藍旂千總王士清前哨領旂勇目邱盛懷皆江皖人揚言餉項積欠將近一年西北苦寒尤不慣受各脅其眾倉黃奔潰計同潰者三百九十六名馬四百三十餘匹臣比飛咨陝西撫臣邵亨豫提督李輝武曹克忠飭陝邊各營扼截要隘一面

飭秦州清水各防營准備迎剿一面調提督蘇家良帶所部馬隊兩營總兵李國良步隊一營由狄道赴伏羌進剿時潰卒已由馬營監出通渭過伏羌趨禮縣迫脅駐紮長道鎮之副白旂馬隊副白旂總哨遊擊張成倫力戰遇害潰勇仍脅其眾南趨甫抵伏羌適蘇家良帶隊馳至殺潰卒三十餘名倉卒間誤殺楊世俊所遣招諭之將弁數名潰卒卽夜遁秦州又自秦州遁清水經關山圍眾邀截亦斃潰卒數名楊世俊馳至收回被裹之副白旂弁丁一百四十騎各營被裹勇丁亦有騎馬隨同衝出者僉稱起意潰走者實止百餘人多江皖籍此外二百餘名無不急思自拔惟被王錦如等防制不能驟脫楊世俊卽帶數騎馳往招之甫近白沙堡

奏稿卷四十二

五

團眾疑爲潰卒後隊阻截不前次日復往則潰卒已竄隴州長溝旋由汧陽草碧溝分起狂竄一竄鳳翔一竄靈臺界崔木鎮追軍已相隔一日程矣幸曹克忠親督所部馬步各營由乾邪分道截擊其自鳳翔竄出者投於總兵徐邦道其自崔木鎮竄出者投於遊擊潘萬才而潰卒已悉數收輯盡矣據各處稟報所收潰卒共六百餘人蓋併沿途裹脅之數而言也臣飭楊世俊及蘇家良魏光燾各率追師回防俟事定徐議所以處之者有此一變而調防填紮北山之局不能急辦穆圖善有函催促臣魏無以應也伏思臣所部各軍自平涼以西分紮至蘭州東關坡計程七百餘里自平涼以北分紮至環縣花馬池以及甯靈中衛又自中衛西南分

紮靖遠與安定皋蘭交界之處計程委折近二千里其甘南鞏秦
階一道多從前戍軍以無餉不能多撤亦須臣所部點綴相與維
持計程縱橫近千里其河州新定之區又須分布各軍聯絡其間
以資控制前派攻鞏肅州共馬步十二營近撥攻鞏西甯馬步十
八營屢據徐占彪劉錦棠稟求濟師臣亦無以應甘肅地居荒遠
舊爲漢回雜處之地西與番族接壤而居變亂之後尤需兵力鎮
壓免啟戎心兵勇移調爲艱深虞顧此失彼臣早慮兵單顧未敢
以增兵上瀆

宸聰者協餉已欠至千數百萬催呼莫應也地廣人荒產糧不多
採買無出也山谷層疊專恃陸運陸運專恃車馱亂離之後騾馬
雕耗接濟孔艱也頻年憂煩萬狀拮据不遑非但不敢增兵并恐
兵增而先以速潰者以此茲幸人民漸集耕墾漸多各軍所駐之
處多已開屯又仰蒙

朝廷福庇歲事稍豐軍糧可免支絀轉運勞費亦資節縮自宜增
調勁旅以速戡定之功竊見湖南提督宋慶所部駐神木一帶見
在甯夏安謐邊外草地實無巨寇往來且纏金有金運昌一軍駐
紮足資屏蔽若調其赴甘助勦於定安無所損而於微臣則大有
益宋慶廉樸勇敢尤得軍心昔年于役

畿輔臣與同事最稱相得嗣臣遵

旨撥交李鴻章節制調遣彼此仍契洽無間也度隴以來宋慶關

念大局歲時遣人遠來問勞兼察軍情其於公義私情惓惓不已
如此如蒙

聖慈敕令赴甘度不憚於西行合無仰懇

天恩敕下綏遠城將軍定安迅令宋慶統帶全軍來甘助剿以速
戡定出自

聖裁至宋慶赴甘應由榆林綏德一帶至鄜州合水慶陽涇州平
涼以抵蘭州如蒙

俯允所請臣自當飭沿途各局預辦糧料草束以遄其行不至停
待至該軍餉銀本由河南解濟并懇

敕下河南撫臣源源批解俾毋缺乏庶師行糧隨於事更期有濟

奏稿卷四十二

七

合併聲明所有通籌大局請調毅軍情形謹繕摺馳奏伏乞

皇太后

皇上聖鑒訓示謹 奏

軍機大臣奉

旨另有旨欽此

請 敕張曜分營駐靈州花馬池一帶片

同治十一年九月十九日

再廣東提督張曜見駐甯夏分營駐鎮番防剿威名素著馭軍嚴明河西之民畏而懷之前此曾接其來函甯夏無事如須兵力助剿亦不辭勞臣以甯夏要區屏蔽最遠未敢冒昧陳奏見在甯夏防務已鬆鎮番又有金順派營進紮是分防鎮番之營可以抽回可否

敕下張曜分營駐靈州花馬池一帶以便替出提督譚拔萃所帶老湘步隊三營馬隊一營前赴西甯隨同劉錦棠攻剿以期得力伏候

聖鑒訓示施行謹 奏

奏稿卷四十二

天

軍機大臣奉

旨另有旨欽此

密陳西甯賊情片

同治十一年九月十九日

再見署西甯知府馬桂源本循化回民捐納候選同知前任西甯辦事大臣玉通在事時力持撫議先委馬桂源署循化同知同治八年又咨穆圖善委馬桂源署西甯知府以本地回人署理地方篆務又以馬桂源之兄馬本源署鎮標遊擊代辦西甯鎮篆務臣前此所以有西甯名存實亡之奏也竊維西甯卽古湟中地屬荒服漢民與番回雜錯而居自陝回肇衅以來西甯卽藉辦教爲名乘機煽變玉通力不能制則抑漢以扶回冀圖旦夕無事其時回目馬尒三狡黠異常旣以撫局愚官復挾官以鈐制漢民凌虐殘殺無所不至漢民競訴於玉通玉通無如之何臣度隴後疊據西

奏稿卷四十二

无

甯各屬丹噶爾士民來營泣訴冤苦比以兵力遽難分布飭暫爲隱忍聽候籌辦旋據西甯鎮黃武賢稟首逆馬尒三已伏冥誅西甯回目係馬桂源之叔馬永福接充馬永福在湟回中尙稱謹愿惜性懦不能制諸回見官軍進剿河州懼其波及具稟乞撫適河回馬占鼇亦夾馬桂源乞撫馬桂源赴臣安定行營具稟臣與穆圖善豫師會議十二條出示曉諭令其遵照一面派道員馮邦棟赴碾伯察看情形妥爲籌辦馮邦棟到碾先後收繳馬械千餘拔出陝回男婦千餘口分起安插化平川及大岔溝等處其西甯各土回延不呈繳詰其故則稱陝回白彥虎禹得彥崔三等踞大小南川四出擾害須暫畱馬械以備不虞并請驅逐陝回以安湟境

臣固料其心懷叵測然其時奸謀未露若持之過急必以官兵激變爲詞迫脅其眾致起事端遂飭提督何作霖帶馬步八營先赴碾伯聲言進剿陝回飭劉錦棠率馬步十營繼之劉錦棠至碾伯諭曉官軍進剿大小南川在此路經過土回毋庸驚恐比抵大峽口修壘則土回已與陝回合股抗拒矣據撫回閻興春等探報馬桂源八月初十日在西甯府東關私宅密約禹得彥白彥虎崔三等共議抗拒官軍一面調集各土回助逆黃武賢在威遠堡擒獲生賊供亦相同并稱馬本源自稱統領陝湟兵馬大元帥馬桂源仍稱西甯知府在關外調集土回盡帶城中回兵回民以出馬桂源出城兩日不返西甯城內避難漢民習知其詐乘機閉城拒守

奏稿卷四十二

三

請西甯道郭襄之及縣令主辦城防不准馬桂源等入城見查城中回民不過數十戶又皆老弱內變無虞馬永福亦在城中惟其子馬三哇克新教海裏飛四出句煽馬永福不能制見亦不令入城也回性多疑善詐非復尋常賊情可比辦回不外勦撫兼施卽勦撫而言其輕重緩急隨時隨事應之未可稍涉拘執操縱之機異於髮逆捻逆及各處土匪者以此揣度賊情始暗結陝回以拒官軍近因陝回屢經痛創又將諉罪陝回以求苟免據陳湜河州來稟馬桂源又自西甯遞呈哀懇設法拯救亦微言府城官民不肯納已情事臣比飭劉錦棠相機辦理固無所容其遷就亦不必明正其罪遽絕其倖生之心謹將賊中實情豫爲密陳伏乞

聖鑒謹 奏

軍機大臣奉

旨另有旨欽此

奏稿卷四十二

奇營勇潰自請議處片

同治十一年九月十九日

再奇營馬隊之潰實由憚於西行若輩多出自降捻强悍而不耐勞苦乃其本性所稱欠餉將近一年雖非虛誣卻較之臣部各營積欠一年零三四箇月者猶爲優矣胡獨該潰卒以此藉口至統領降補參將楊世俊平日待將弁勇丁頗有恩誼人素廉勤該潰卒無從肆其謗詆且楊世俊自帶青旂馬隊一營及步隊兩營均已安靜抵省各起潰卒各由駐營之地分道赴省先時不及詳悉開導致有此變嗣馳赴前途亦收輯副白旂一營雖所部潰走難辭咎責而情實可原合無仰懇

天恩免其置議惟

微臣

忝領兵符平時未能曉以大義偶爾餉缺

奏稿卷四十二

三

遂致紛紛潰逃又旬日三次檄催未及詳察軍情遽加督責亦屬思慮不周疏誤之咎實無可辭應請

旨交部議處以昭軍律伏乞

聖鑒謹 奏

軍機大臣奉

旨另有旨欽此

軍機大臣字寄同治十一年九月三十日奉

上諭左宗棠奏攻剿西甯肅州回匪獲勝統籌甘省全局請調朱慶一軍助剿請救張曜分營駐靈州花馬池密陳西甯情形楊世俊所部潰卒請免置議并自請議處各摺片覽奏均悉西甯回匪始以乞撫爲緩兵之計旋結陝回抗拒官軍經劉錦棠等督軍進剿疊挫兇鋒惟逆首白彥虎等皆積年悍賊詭譎多端必須厚集兵力方能制其死命著左宗棠一面飭令劉錦棠等實力進剿一面添派勁旅繼進以期早日蕩功西甯城內漢民閉門防守亦當設法援應內外聯絡俾免疏虞馬桂源旣爲府城官民所拒卽著令其不必入城以釋羣疑左宗棠仍當隨時察看情形相機辦理

奏稿卷四十二

三

肅州官軍雖屢次攻剿獲勝而該逆負隅如故著左宗棠飭令徐占彪穩慎進攻力圖克拔并酌量添兵合圍毋任鋌走甘省被兵日久亟應速籌戡定刻下西甯肅州均須增軍攻剿省北一帶亦須派營填紮兵力不敷分布宋慶一軍素稱得力見在陝省北路邊境尙屬安謐著定安卽令該提督統帶全軍赴甘助剿該軍由榆林綏德一帶取道慶陽平涼以抵蘭州左宗棠擬飭沿途各局豫辦糧草軍行當不至遲滯宋慶接奉諭旨卽著剋期拔隊起程迅赴戎機本日并已諭令錢鼎銘將該軍月餉源源接濟矣神木一帶如尙須派兵填紮卽著定安酌度布置左宗棠見擬將譚拔萃所部官軍調赴西甯所有靈州花馬池一帶卽著張曜就近分

營駐紮以資穩固穆圖善仍當飭令駐紮甘省城北之馬步各隊
照舊駐紮認真防勦勿遽裁撤楊世俊所部勇丁潰散情尙可原
著免其置議左宗棠自請議處并著加恩寬免將此由六百里諭
知左宗棠穆圖善定安并傳諭張曜宋慶知之欽此

奏稿卷四十二

五

請將丁憂提督徐占彪畱營帶兵片

同治十一年九月十九日

再據提督徐占彪稟稱親父徐耀於同治十一年三月十二日在籍病故提督係屬親子例應丁憂懇卽委員接統各營俾得交卸回籍奔喪等情前來查徐占彪於客冬進攻肅州奮迅無前爲賊所憚茲僅孤城未破正攻勦萬緊之時勢難遽易生手合無仰懇天恩准令徐占彪畱營帶兵俾得迅拔堅城以竟全功俟肅州軍務平定再由_臣給咨回籍以遂孝思而符定制除咨部查照以該提督聞訃之日作爲丁憂日期外謹附片具陳伏乞

聖鑒訓示謹 奏

軍機大臣奉

奏稿卷四十二

五

旨著照所請該部知道欽此

軍機大臣字寄同治十一年九月二十日奉

上諭景廉奏回目遞稟投誠設法籌辦一摺回目馬明等遞稟投誠據稱權與安集延說和以待外援懇請發兵馳救其言雖未可深信亦應設法羈縻景廉擬俟該回將家屬送至濟木薩卽檄調徐學功等營赴古牧地幫同馬明駐守藉作官軍屏蔽自是權宜辦法仍著景廉隨時體察情形相機籌辦毋爲該回所紿俄人占據伊犁後復差人時至精河一帶要挾該處戶民希圖收爲彼用近又有東取瑪納斯之說若不先發制人迅將烏魯木齊規復則俄人得步進步後患何堪設想景廉兵力單薄未能剋期進取成祿奉命出關爲日已久不統兵西進又不將景廉所調吉林黑龍

奏稿卷四十二

美

江馬隊及李天和所部飭令啟行觀望徘徊擁兵自衛實屬貽誤機宜著卽懷遵諭旨先將所部吉林黑龍江馬隊及李天和營勇檄赴景廉軍營以厚兵力不許藉詞延宕并將吉林黑龍江馬隊及李天和營勇先後拔隊日期迅速奏聞景廉當一面籌畫進兵爲規復烏垣之計伊犁情形如此俄人叵測如此左宗棠當顧全大局將出關馬步各隊糧餉隨時源源籌濟并嚴飭經過地方官妥爲照料俾利師行毋得稍分畛域至安敦玉地方關繫軍行後路必須有兵填紮方免空虛曹克忠見紮陝境徐占彪在肅州攻勦正當喫緊未必有兵可撥該處係左宗棠轄境應如何撥兵前往駐紮之處著該大臣妥爲調度務臻周密景廉另片奏擬在察

哈爾設立轉運糧臺請派徐樹銘督辦等語景廉在察哈爾設立糧臺一切督催轉運事宜卽著額勒和布景瑞派員經理以專責成所請令徐樹銘前往督辦之處著毋庸議又另片奏請撥天津洋槍等語已諭令李鴻章照數採買卽著景廉派員赴直領取以資應用將此由六百里各諭令知之欽此

奏稿卷四十二

懇豁免茶商積欠課銀并擬變通試辦摺

同治十一年十月十五日

奏爲茶商積欠歷年課銀無力交納懇

恩豁免并擬變通試辦章程恭摺仰祈

聖鑒事竊查甘肅茶商承辦西甘莊三司茶引二萬八千九百九十六道歲納課銀一十二萬八千九百餘兩內改折正供銀八萬六千九百餘兩養廉捐助充公官禮四項雜課銀四萬一千九百餘兩軍興以來引茶被焚道梗商逃茶務因以廢弛同治五年前督臣楊岳斌據前蘭州道華祝三議設官茶總分各店歸併古城茶稅以及免釐稅緝私販計四條奏蒙

敕部議覆照准數年以來因回逆滋擾久未試行茲軍務漸平而

奏稿卷四十二

奏

逃商不敢復充新商亦無應募者推原其故實因停辦已久積課過多商情咸畏代償前欠額引故皆裹足不前若不於成例稍示變通茶務終難整頓前據署蘭州道升任山西臬司蔣凝學酌議清欠清引清課清商四條尙稱詳晰臣復飭司道悉心研究利弊源委擇其可行者妥議詳覆去後茲據藩司崇保臬司楊重雅署蘭州道琚武公同籌議查茶商積欠帶徵課銀及已領茶引欠課不下四十餘萬兩各商委因匪擾無力呈交至每年額領茶引二萬八千餘道引地多被蹂躪誠難足額每引一道改折銀三兩又徵雜課銀一兩四錢零試辦之初斷難照數完納必須豁免積欠課銀停止應徵雜課仍分咨陝西山西兩省轉飭各商原籍查傳

力能承引之商飭令到甘量力由臣給票以票代引赴湖採茶自同治十二年爲始能行一引之茶卽納一引之課從前積引飭令一律呈繳不復代爲行銷以杜弊端俟試辦二年督看實能行銷茶引若干道再行飭領引以昭核實庶茶課可冀日有起色等情詳請具奏前來臣覆核無異合無仰懇

天恩俯念該商等積欠銀兩因頻年賊擾銷路梗滯實與尋常商欠不同概予豁免俾試辦商人得以劃清界限承完新課以免賠累并請

俯允暫照所議章程先行試辦其同治元年奉頒茶引緩至辦有成效再飭承領此外如有增減未盡各事宜容臣隨時陳明以期

奏稿卷四十二

五

周密所有變通四條恭繕清單進呈

御覽除飭該司道查明商人積欠之正雜課銀細數并已領茶引分別已行未行又同治元年被匪焚劫茶封各實數繕單詳候奏咨外謹恭摺具陳伏乞

皇太后

皇上聖鑒敕部議覆施行謹 奏

軍機大臣奉

旨戶部議奏單併發欽此

請 敕閩省酌撥輪船經費片

同治十一年十月十五日

再閩省輪船經費經船政大臣沈葆楨提調道員夏獻綸力求樽節每月尚需實銀約七八萬兩沈葆楨交卸時存款二十餘萬兩儲料亦多年來接續支銷銀料俱盡臣接據船局函牘憂慮殊深伏查閩省素顧大局卽如西征協餉原協每月銀四萬兩必按時籌解卽增撥每月銀四萬兩亦源源附解截至本年六月止所欠不過一百二十五萬兩復經該司道詳稱每月除報解五萬兩外請以該省甘捐之半抵解欠餉經臣奏明在案是該省於原協之款不遺餘力卽增撥所積欠者亦且設法清償固未嘗置之度外也臣維甘肅飢軍待哺甚殷閩省每月措解五萬兩固屬力顧大局然輪船一事尤全局攸關臣係創議之人何敢稍形膜視合無仰懇

奏稿卷四十二

早

天恩敕下閩省督撫臣行知司道除每月解臣軍銀五萬兩外於欠解甘軍積餉內酌撥銀若干爲輪船經費如實力不能及或於見解臣軍餉項五萬兩內及甘捐項下改撥銀二萬兩交輪船局收支以免廢輟緣西事安危尙不過一時之計而輪船則控馭西海實

國家久遠之規彼此相形迥異也如蒙天恩敕下戶部速議以東南各省財力爲

國家成此一舉似亦非難此則區區之愚未敢冒昧陳請者也是

否有當伏乞

聖鑒訓示施行謹 奏

軍機大臣奉

旨戶部速議具奏欽此

奏稿卷四十二

皇

西甯剿匪大捷立解城圍摺

同治十一年十一月初九日
會西甯辦事大臣豫師銜

奏爲詳陳西甯剿匪捷狀并續獲大捷攻破小峽口堅壘數十座
徑薄西甯府城立解重圍見籌辦情形恭摺馳陳仰祈

聖鑒事竊照統領湘軍道員劉錦棠八月二十四至九月初四日
西甯剿匪獲勝并初六日踏破觀音堂賊壘大略情形已於九月
十九日附片具陳并聲明詳細情形容俟續報八月二十四日馬
步賊數千分爲二股一循山而下直撲西營卡都司李雙良防營
一出彥才溝阻截前路各營劉錦棠率遊擊熊隆名都司董福祥
副將陳宗蕃分道往擊遙見撲營之賊僅五六百而山谷溝坎伏
賊甚多劉錦棠麾軍急進李雙良亦出壘夾攻先將撲營之賊擊

奏稿卷四十二

聖

敗原上之賊預砌礮臺憑高下擊適提督譚和義蘇大德羅照陞
陳啟明副將陶鼎金各率馬步由平戎驛馳至賊之出彥才溝者
知勢不敵縮退溝內熊隆名乘勢壓追譚和義等鼓銳登山立殲
悍賊多名賊乃大潰逐北越嶺斃賊百餘名是夜馬步隊分伏彥
才溝口擬俟賊出擊之賊知有伏不出二十五日羊角灣賊數千
列隊小峽口各山頭另有千餘賊由三十里鋪撲提督譚上連營
壘提督何作霖余虎恩出隊援之譚上連亦憑壘力擊礮石雨注
賊負創遁劉錦棠聞報密調後路馬步合紮三十里鋪各營并於
營邊修砌礮臺安放後膛開花車輪大礮以待二十六日賊匿不
出而遑北陝回營內出騾馬千餘放草副將鄧增以車輪大礮測

準向人馬聚處轟之連開三十餘礮礮子半飛入賊壘半落人馬叢中賊棄壘越山而逃是夜湟北收屍之賊紛呶徹旦斃賊蓋不知其數也二十七日各營仍依山設伏午間賊由山頂迤邐而下熊隆名以馬隊誘之賊見隊少徑前擁撲鄧增仍連施大礮何作霖等分隊擊之賊大潰追近賊卡而返旋據西營防營李雙良報稱是日馬步賊千餘撲近營壘李雙良憑牆力禦有悍賊揮大刀徑撲營濠爲官軍洋槍擊倒羣賊以矛杆昇之而逸復獲生賊詢之蓋卽白彥虎也二十八日各營仍於三十里鋪設伏賊僅以數百人散匿山谷官軍亦以零隊擊之賊遁劉錦棠以羊角灣之賊知我有備料不復出而高疆溝緊偪平戎爲白彥虎畢大才之黨

奏稿卷四十二

聖

所據倚觀音堂紅水泉爲固必誘出創之遂抽隊夜抵彥才溝口二十九日見馬賊百餘馳騁溝中大股繼出陳宗蕃佯作敗狀誘其深入賊噪而前伏隊四起賊駭而奔追殺十餘里賊屍枕藉遙見駱駝堡賊卡十餘座劉錦棠揮軍緊追賊不及入卡守卡者亦相隨狂竄時已黃昏卽就賊壘分軍駐之凌晨檢視賊屍計五百餘具刀矛槍礮則拾不勝拾矣據生擒土回領隊馬仲供稱白彥虎於二十七日出隊爲礮子洞穿左乳又西甯逆回馬桂源之弟馬眞源亦爲礮子洞穿右肋撒拉回目多拜爲官軍擒斬此八月二十四日至九月初四日以前剿賊連獲大勝之實在情形也該逆屢經痛剿仍恃眾穩抗并分股繞出沙溝一帶伺劫糧運時督

帶綬定營候補直隸州知州龍錫慶駐大峽口初五日率所部三百人循探賊蹤甫抵郭爾堡卽遇逆股四五百人蜂擁接戰龍錫慶擊敗之追抵沙溝乘勝破賊壘一座守賊殲焉餘三座驚竄官軍入堡傳餐忽有大股驟至偪堡環攻龍錫慶力守達曙亡傷弁丁七十餘人仍整隊旋營參將禹士立督戰不力龍錫慶斬之軍前以徇劉錦棠聞龍錫慶深入被圍初六日黎明飛調馬步向觀音堂溝赴援入溝十里許道旁有賊堡七座馬隊先至堡賊紛紛出拒比步隊至奮威衝殺賊棄巢奔立焚其巢躡追八九里大堡中出馬步賊千餘另股由兩山旁抄出劉錦棠分軍力戰三時之久賊均敗潰適龍錫慶亦已旋營遂收隊還初八日小峽之賊以

奏稿卷四十二

閩

大股出撲營壘另股由左面山溝抄出劉錦棠飭譚上連等列隊壘前飭鄧增以大礮向擊賊譚潰不復成列馬步跟蹤馳追山溝之賊從旁衝出陶鼎金等下馬持矛攢刺何作霖等分路抄之賊不能支追越山巔斃賊三四百名初九日賊大股趨北岸鄧增以大礮擊散其南岸賊千餘排列山頂各營以槍礮仰擊旋亦敗遁初十日副將譚慎典率親軍馬隊赴碾伯迎糧過平戎驛忽馬賊二百餘擁至譚慎典分其隊之半護糧一半接仗行近高店堡都司張俊率隊從堡中躍出賊紛竄十二三兩日劉錦棠抽隊赴平戎驛修橋并渡湟至紅崖子溝築壘以通威遠堡糧路威遠之馬圈口班家灣等處時有回逆出擾疊經統帶靖西三營提督西甯

鎮總兵黃武賢搜剿頗有斬馘十四日平戎橋工將竣有百餘馬賊從觀音堂溝彥才溝鼓噪而來劉錦棠飭陳啟明陶鼎金等率馬隊衝擊南山復有大股賊至縣互二十里陳啟明等以眾寡懸絕收隊憑壘施放槍礮劉錦棠飛令各軍渡湟而南賊趁官軍半渡四面猛撲適譚和義蘇大德齊至士卒直前奮擊斃賊多名熊隆名董福祥時在馬營灣聞平戎驛礮聲甚緊疾馳而來提督席大成尹興茂等亦至張兩翼分抄羅照陞陳啟明等乘機猛進賊大敗官軍合圍兜追斬馘二百餘名生擒十五名十五夜賊乘雪於李雙良營壘西三里山巔連築七卡大股分紮隔截前敵各營十六日劉錦棠前往察看馬賊擾至平戎驛步賊排列護卡約近

奏稿卷四十二

星

萬人劉錦棠飭李雙良堅守勿出飛率各營渡橋直上馬賊向前抗拒官軍槍礮齊發立斃多人猛追抵馬營灣對岸劉錦棠飭令蘇大德等築壘羅照陞等列隊以待賊忽大至馳下平川適何作霖席大成尹興茂等馳至鄧增亦護大礮前來連開數礮賊稍卻各軍分左右力戰殲馘無數賊縮退壘中官軍偪攻壘中礮石紛飛官軍傷亡不少劉錦棠令勿撤隊是夜風雪嚴寒裂膚刺骨軍士露立賊壘之外無敢稍懈十七日黎明劉錦棠由北岸亂流而渡令鄧增以大礮向山頂連轟賊不能支大股走匿山凹劉錦棠以堅壘驟難蕩平乃整旅折赴馬營灣河灘上下令董福祥連夜添造木橋二十日抽撥三營渡湟築壘令譚上連何作霖等分扼

湟南北以扼賊衝部署甫定賊果率大股下山意圖阻官軍工作何作霖等分途盪決斃賊數十名賊敗上山梁少頃復率數百騎由北岸山溝衝近河邊劉錦棠飭各軍迎剿一面令鄧增以大礮隔河轟之賊大敗而逸陶鼎金等飛馬截之斬馘多名生擒一名二十二三兩日賊時以零騎分擾南北而於紅莊子對岸聯紮數壘蓋防官軍由北岸進攻也劉錦棠佯若不知日夜督修橋壘并於橋兩旁築礮臺護之二十四五六等日陸續派隊往碾伯接糧并增修卡壘零賊時出阻擾多被擒斬二十八日五鼓大股撲近新修之卡白彥虎畢大才之黨約土回由馬營灣山下平川渡湟兩股將合約七八千人劉錦棠分軍渡湟猛撲之賊惶懼縮退其

奏稿卷四十二

吳

烏水不及者董福祥等悉斬之賊回撲席大成營壘董福祥等由左路馳至夾擊賊仍敗遁湟南之賊見北岸賊敗渡水來援尹興茂等折回來擊賊翻山而竄是日步賊千餘至小峽口分股伏溝中昇大鐵礮攻何作霖之營礮子墜入壘中者約重二斤餘何作霖率隊從壘牆躍出擊散賊眾并奪其礮二十九日劉錦棠令於北岸山上修築一營十月初一日又於新營西五六里增修一營爲進偏計兩日有馬步賊來擾均擊敗初二日小峽口賊千餘來撲營壘譚上連等擊斬數十名生擒三名訊據供稱是日陝回往北川攻民寨掠食劉錦棠令各營分左右捲旂疾趨奪高寨之險高寨前一小卡守賊數十人見官軍突至棄卡逃入高寨高寨守

賊約三千餘列械出拒官軍馬步齊進銳不可當忽隔河開花大礮子飛墮賊叢中賊益恟懼驀山滾澗而逃官軍譁噪乘之刀斫矛刺賊屍枕藉高寨一帶十餘卡壘一律踏平比小峽口大隊馬賊來援亦經鄧增以大礮擊退擒斬二百餘名奪獲馬械極多據擒賊趙起太於積屍中指認回目蘇九和一名并供此股陝回最多是夜官軍卽紮於此又增修一壘初三日臣宗棠所調前往助剿之提督劉明燈及副將滕春山等至高寨與劉錦棠晤商劉明燈所部馬步六營從七里鋪延紮至彥才溝替出劉錦棠所部左右翼兩營及綏定兩營以便滾營進取又增修三壘賊見官軍連日於高寨增壘意南岸必虛初五日大股由小峽口出撲官軍迄

奏稿卷四十二

是

未得逞官軍亦未窮追是夜又於八旂壘左山頭增修一卡阻賊包抄之路初六日又於四旂壘西增修兩卡初七日賊大股圍撲新修之卡官軍以連夜未眠僅以槍石火箭火彈禦之賊見官軍不出各持馬刀紛入濠溝何作霖譚上連等分兩路挺矛直出立斬悍賊三十餘名賊稍退適鄧增運大礮至對路狹賊多處連發十餘礮賊乃敗潰初八日分軍扼小峽口正路及西南兩路另派隊上山增修一卡賊紛至官軍擊卻之一股兇悍異常愈擊愈進何作霖憤甚大呼陷陣縱軍衝殺縱橫盪決賊不能支始紛紛敗潰初九日黎明賊大股由三十里鋪竄至官軍按隊不動俟賊漸逼營前乃分左右出擊賊屢卻屢前官軍奮威衝殺立斬悍賊二

十餘名乘勢壓勦斬馘遂多此九月初五至十月初九日滾營進
偏連獲大捷攻克各要隘之實在情形也劉錦棠以南岸難攻遂
於是夜潛師夜起改率各營由馬營灣過橋至高寨會襲小峽賊
壘分前左右三路銜枚馳近北岸賊壘賊始驚覺官軍已蜂擁而
上次第奪山麓三壘拔幟立幟正追逐間忽小峽內塵沙蔽日賊
約萬餘由山頭及中路奔來官軍整隊迎擊殪賊數十左翼一營
列隊左山巔賊力爭此地自辰至申血戰不少卻譚和義等皆身
被數創仍裹創力戰大呼突陣賊皆辟易紛紛敗退是日湟南一
股撲近官營并以槍橫擊湟北官軍經何作霖等擊斃多名是夜
劉錦棠令各營急運磚石增修廢壘并於山頭添修一壘扼之十

奏稿卷四十二

吳

一日賊於對山亦築數壘十二日偵賊大股匿峽中守壘之賊堅
壁不出劉錦棠懸重賞挑選壯士攻南山各卡其北山四壘分各
軍攻其三劉錦棠親率各營隨後策應夜近賊壘乘賊未覺火器
紛飛著處卽然賊驚起拒戰而壯士已從濠中躍出以肩爲梯攀
壘騰上須臾三壘均破南山賊卡亦同時攻克各卡壘賊約近千
人無漏逸者官軍卽夜分填所奪三壘駐之十三日賊大股來犯
劉錦棠飭三壘各以一營守壘餘列長陣護之羅照陞陳宗蕃李
雙良等率所部奮擊斃賊多名立將所破賊壘修築完好護糧入
壘并接修運礮車大道十七日署西甯道郭襄之遣人縋城來告
被圍兩月城中糧食將盡十四夜五鼓賊乘梯襲城雖經擊退然

勢甚危迫乞速應援適馬桂源稟請官軍暫退碾伯卽誠心就撫又撒拉八工回昂貨奴勒等亦具稟代西甯土回乞撫劉錦棠知其意在緩兵十八日黎明飭余虎恩席大成護五十里鋪各壘自率各營護大礮上北岸山頂正在分撥之際賊忽分三股一由小峽口南山一由馬營灣下徑犯官軍營妄意乘南岸之虛其大股則向北山急進劉錦棠以南岸各卡修繕完固力足制賊令鄧增測準北山賊壘開大礮轟擊令譚和義護之一面分飭兩路攻左右賊壘一路擊正中大股一路策應兩時之久發大礮子六十餘賊三壘牆垣皆坍塌避匿溝中劉錦棠麾各路猛進陣斬悍賊二百名賊大潰官軍躡蹤緊追連破北山四面卡壘十餘座乘勝壓

奏稿卷四十二

冕

下山梁賊棄山麓各壘而逃一由湟北竄韻家口一鳧水渡湟而南當將峽內羊角灣羅家灣二十里鋪十里鋪一帶卡壘悉數踏平其南岸之賊見官軍自北而南截其歸路竄走南山之南余虎恩席大成追之破其山上卡壘十餘座越山至羊角灣會隊其竄韻家口一帶者見董福祥羅照陞等引軍突至均棄寨向西甯而逃薄暮劉錦棠飭各營歸隊分紮兩岸賊壘一面整修濠牆防賊回撲夜分馬賊數千復拌命來犯官軍結隊衝擊賊屍遍野仍卽敗遁十九日黎明瞭見西甯附城各莊寨火起劉錦棠飛調馬步迅進比抵東關逆首馬本源馬桂源等已同各土回頭目於先夕三鼓各挈逆眷向東川竄走殿後馬賊數百被陶生林等追擊四

散向南川而遁計連日斃賊約共三四千人馬騾軍械遺棄滿路
署西甯道郭襄之西甯知縣恩祿率城內難民男婦老弱三萬餘
名望塵迎拜喜極而涕劉錦棠宣布

皇仁逐加撫諭令其照常防守其城外老弱回民約千餘口籲乞
曲貸生命亦令免死安插并諭土回被裹者准其歸正安插此十
月初十日至二十日攻破小峽要隘力解西甯府城重圍之實在
情形也臣維碾伯赴西甯距縣七里渡湟水西南達府城兩山對
峙湟水中流古所稱湟中者也由大峽口抵小峽口數十里高峰
危聳中通一徑岸路僅寬數尺兵馬能魚貫不能鴈行南北溝岔
紛歧賊蹤出沒其間排叉子槍平地施放命中較易此次叛逆馬

秦稿卷四十二

五

本源馬桂源兄弟先請官軍驅逐陝回迨官軍甫進大峽口忽喉
陝回助逆拌死抗拒又糾五工八工撒拉回眾合勢抗拒地險賊
眾又皆著名兇狡劉錦棠孤軍深入以馬步十八營分紮八十餘
里賊時於山凹中出隊阻截運道圍撲各營聲氣隔間時須調撥
救援前後計兩月有餘大小五十餘戰幸賴

朝廷威福無戰不捷得以掃除積年兇慝挈湟中境土仍隸職方
此固非臣等所能逆料也至邊地苦寒大小峽口一帶山谷盤互
日月蔽虧冰凌凝結最早計五十餘戰中半皆夜不收隊露立冰
天雪窖中擊柝之聲與號寒之聲相雜而軍士無一怨者非平時
訓練有方奚以致此見據劉錦棠稟報馬本源馬桂源帶同各土

回頭目擊眷將逃入撒拉蓋該逆本循化廳人與撒拉同鄉并撒拉素所暱就者也臣已飭按察使陳湜河州鎮沈玉遂督同河州撫回馬占鼇圖之據報該逆已抵巴燕戎格矣大抵回情最忌縛獻阿訇總須其自投羅網耳至陝回已焚棄所踞大小南川巢穴揚言直奔甘州嗣仍踞西川未動意或求撫亦未可知臣宗棠前調提督吳隆海率果軍降補參將楊世俊率奇捷馬步等營合馬隊三營步隊八營隨同劉錦棠進剿比抵碾伯則小峽口業已攻克劉錦棠兵抵西甯矣見正搜除餘匪分別剿撫以靖地方所有此次最爲出力員弁合無仰懇

天恩加以鼓勵

奏稿卷四十二

三

賞穿黃馬褂三品卿銜布政使銜卽選道雲騎尉世職法福靈阿巴圖魯劉錦棠敏銳善戰謀勇兼優耐苦耐勞爲一時統將之最臣等不敢妄擬保敘應如何加

恩之處出自

聖裁

賞穿黃馬褂頭品頂帶記名提督達桑阿巴圖魯何作霖識略過人膽勇出眾爲賊所憚應請無論甘肅提鎮缺出儘先題奏頭品頂帶記名提督奇車博巴圖魯余虎恩忠勇奮發能衝能堵應請遇有陝甘提鎮缺出儘先題奏并

賞穿黃馬褂頭品頂帶記名提督伯奇巴圖魯譚上連隊伍整嚴

樸實勇敢應請遇有陝甘提鎮缺出儘先題奏頭品頂帶記名提督霍隆武巴圖魯席大成頭品頂帶記名提督奇朗阿巴圖魯譚和義頭品頂帶記名提督果勒明阿巴圖魯羅照陞頭品頂帶記名提督哈豐阿巴圖魯尹興茂均請

賞穿黃馬褂記名提督呼敦巴圖魯蘇大德請

賞給頭品頂帶記名提督和爾經額巴圖魯陳啟明請

賞給正一品封典總兵銜推補副將譚慎典請免補副將以總兵交軍機處記名請

旨簡放總兵銜安徽補用副將依清阿巴圖魯陳宗蕃請

賞給頭品頂帶副將銜儘先拔補參將陶鼎金請

奏稿卷四十二

五

賞給清字勇號記名提督巴克坦巴圖魯蕭元亨請

賞給頭品頂帶提督銜記名總兵綽勇巴圖魯楊耀關記名總兵

直勇巴圖魯黃錦雲均請

賞換清字勇號花翎補用都司董福祥請免補都司以遊擊畱於陝西儘先補用并

賞給二品頂帶二品

封典藍翎補用都司張俊請免補都司以遊擊畱於陝西儘先補用并

賞換花翎

賞給勇號藍翎補用都司李雙良請免補都司以遊擊畱於陝西

儘先補用并加參將銜

賞換花翎花翎補用都司張萬會請免補都司以遊擊畱於陝西儘先補用并加參將銜記名提督多托哩巴圖魯潘長清記名提督訥恩登額巴圖魯陳建侯記名提督阿木巴凌武巴圖魯楊玉週記名提督努克齊思斯琿巴圖魯李有成記名提督喀勒崇依巴圖魯王福田記名提督瑚松額巴圖魯李政洪記名提督愛什蘭巴圖魯唐國華均請

賞給頭品頂帶記名提督揚勇巴圖魯劉象賢記名提督額特和恩巴圖魯宋祥發記名提督業鏗額巴圖魯鄧時益記名提督蘇彰阿巴圖魯李隆寶記名提督西吉爾琿巴圖魯李清勝記名提

奏稿卷四十二

五

督捍勇巴圖魯喻少連記名提督額騰依巴圖魯匡義志記名提督伊伯德恩巴圖魯彭明達記名提督訥恩登額巴圖魯李春元記名提督雄勇巴圖魯李恆春記名提督傑勇巴圖魯周恆升提督銜記名總兵懋勇巴圖魯朱正和均請

賞給正一品封典記名提督納清額巴圖魯李協和記名提督額爾蒙額巴圖魯趙寶林均請

旨交部從優議敘記名提督奮勇巴圖魯廖得勝記名提督捍勇巴圖魯彭楨祥提督銜記名總兵勉勇巴圖魯郭慶才記名總兵武勇巴圖魯曾昌明記名總兵力勇巴圖魯蕭玉吉總兵銜補用副將銘勇巴圖魯李克常總兵銜補用副將奮勇巴圖魯符世禮

副將銜補用參將偉勇巴圖魯胡義和均請

賞換清字勇號記名提督黃友信記名提督邱俊鳳總兵銜湖南儘先補用副將張沛福建補用副將鄧增均請

賞給清字勇號鄧增并

賞加總兵銜記名提督張振壽劉得喜二品頂帶參將銜兩江補用遊擊李章貢遊擊銜陝西補用都司楊錦棠均請

賞給勇號提督銜記名總兵鷺勇巴圖魯賀長發記名總兵阿克丹巴圖魯湯秀齋記名總兵穆勇巴圖魯歐陽勝記名總兵質勇巴圖魯葛致清記名總兵翊勇巴圖魯劉國斌均請以提督總兵記名遇有提鎮缺出請

奏稿卷四十二

書

旨簡放提督銜記名總兵愛星阿巴圖魯雷貴才記名總兵穎勇巴圖魯喻先達總兵銜畱陝補用副將姜鏡成總兵銜補用副將彭榮復均請以提督總兵記名遇有提鎮缺出請

旨簡放記名提督克勇巴圖魯陶生林請

賞給頭品頂帶并

賞換清字勇號補用副將克勇巴圖魯胡英傑補用副將董官寶李榮珥張得榮賀益陞總兵銜兩湖補用副將強勇巴圖魯蘭福喜補用副將端勇巴圖魯周廷福補用副將譚全才楊再發均請免補副將以總兵記名請

旨簡放副將銜補用參將程玉修儘先參將盧有升藍翎儘先拔

補參將周國泰均請免補本班以副將儘先補用并加總兵銜周國泰并

賞換花翎參將銜畱陝補用遊擊楊金龍參將銜福建補用遊擊威勇巴圖魯唐玉德參將銜兩江補用遊擊蘇秀生均請免補本班并請免補參將以副將仍畱原省儘先補用楊金龍蘇秀生并賞給勇號參將銜儘先遊擊袁紹華請免補本班并免補參將以副將儘先補用并

賞給勇號補用遊擊沈玉貴請免補遊擊并免補參將以副將畱於湖南儘先補用二品頂帶遊擊銜補用都司楊廷榦遊擊銜儘先補用都司劉長其傅長春鄒祖德張得昇補用都司李孝隆均

奏稿卷四十二

蓋

請免補都司并免補遊擊以參將儘先補用張得昇劉長其李孝隆并

賞給勇號參將銜兩江補用遊擊榮勇巴圖魯鄧金陵請免補本班以參將仍畱原省補用并加副將銜遊擊李得勝請免補本班以參將儘先補用并

賞給勇號遊擊銜河南補用都司秀勇巴圖魯蘇貴興請免補都司并免補遊擊以參將畱於原省補用并加副將銜湖南補用都司彭秀文兩江補用都司胡少亭均請免補本班以遊擊畱於原省補用彭秀文并

賞給勇號胡少亭并加參將銜藍翎補用都司周玉堂請免補都

司以遊擊儘先補用并

賞換花翎都司銜湖南補用守備朱星貴請免補守備并免補都司以遊擊仍畱原省儘先補用花翎守備趙自新石成玉田九福張登鼐李雙海王廷棟田仲魁藍翎守備丁添祥均請免補守備以都司儘先拔補并加遊擊銜守備銜千總羅言王俊邦胡登花張果張廣吉杜錫斌董天海苗仲會何有道均請免補千總并免補守備以都司儘先補用藍翎千總熊來儀范永清聶青山均請免補千總以守備儘先補用并

賞換花翎補用把總張瑞揚董占富趙奉樂薛成德均請免補本班以千總儘先補用并加守備銜張瑞揚并

奏稿卷四十二

美

賞戴藍翎儘先外委夏德華請免補外委并免補把總以千總儘先補用并

賞戴藍翎運同銜分省補用直隸州知州優勇巴圖魯武條箴候選直隸州知州王鎮墉畱陝前先補用直隸州知州周漢均請免選補本班以知府畱於陝西歸軍功候補班前補用畱陝補用直隸州知州龍錫慶請以本班改畱甘肅歸候補班前先補用并加知府銜藍翎山西補用知縣吳光熊請免補本班以知州仍畱原省歸軍功候補班前先補用并

賞換花翎同知銜浙江候補知縣袁奎齡請俟補缺後以同知歸軍功候補班前先補用此外實在出力員弁勇丁容俟彙案保獎

以示激勵其疊次陣亡將弁實均係百戰精銳於縋幽鑿險中力竭捐軀實堪軫惜謹另繕清單伏懇

天恩敕部分別從優議卹以作士氣而慰忠魂謹合詞陳奏伏乞
皇太后

皇上聖鑒訓示施行謹 奏

軍機大臣奉

旨另有旨欽此

熊隆名請開復原官

賞還勇號片

同治十一年十一月初九日

再降補遊擊熊隆名因奉差在途多索供支并借支弁勇薪糧銀兩勒追始繳經臣於同治八年八月二十九日奏參將記名提督瑚松額巴圖魯熊隆名以提督記名之處註銷并撤去勇號以遊擊降補在案自後該遊擊深知愧勵此次隨劉錦棠進剿西甯倍加奮勇疊立戰功合無仰懇

天恩俯准開復提督原官仍交軍機處記名并

賞還勇號以昭激勸謹附片具陳伏乞

聖鑒訓示謹 奏

軍機大臣奉

奏稿卷四十二

奏

旨另有旨欽此

同治十一年十一月二十日內閣奉

上諭左宗棠豫師奏剿匪獲捷西甯府城解圍出力各員弁請獎并將陣亡各員弁開單請卹一摺叛逆馬本源等糾集陝回及撒拉回眾圍撲甘肅西甯府城經左宗棠派令道員劉錦棠等督兵進剿連戰克捷踏毀小峽口等處賊壘數十座乘勝直薄城根該逆抵死抗拒官軍結隊奮擊賊太潰敗立解西甯城圍統計斃賊三四千名奪獲騾馬器械無算剿辦尙爲得手道員劉錦棠著賞給白玉翎管一枝白玉搬指一箇大荷包一對小荷包兩箇火鏢一把以示優異提督何作霖著無論甘肅提督總兵缺出儘先題奏余虎恩著遇有陝甘提督總兵缺出儘先題奏并賞穿黃馬褂

奏稿卷四十二

堯

提督譚上連著遇有陝甘提督總兵缺出儘先題奏席大成等均著賞穿黃馬褂蘇大德著賞給頭品頂帶陳啟明著賞給正一品封典副將譚慎典著免補副將以總兵交軍機處記名請旨簡放陳宗蕃著賞給頭品頂帶參將陶鼎金著賞給胡敦巴圖魯名號提督蕭元亨著賞給頭品頂帶總兵楊耀關著賞換達春巴圖魯名號黃錦雲著賞換瑚松額巴圖魯名號都司董福祥張俊均著免補都司以遊擊畱於陝西儘先補用董福祥并賞給二品頂帶二品封典張俊并賞換花翎賞給果勇巴圖魯名號李雙良張萬會均著免補都司以遊擊畱於陝西儘先補用并賞加參將銜李雙良并賞換花翎提督潘長清等均著賞給頭品頂帶劉象賢等

均著賞給正一品封典李協和等均著交部從優議敘廖得勝著賞換錫林巴圖魯名號彭植祥著賞換琿武巴圖魯名號總兵郭慶才著賞換斐凌阿巴圖魯名號曾昌明著賞換奇車博巴圖魯名號蕭玉吉著賞換吉勒通阿巴圖魯名號副將李克常著賞換勒爾金巴圖魯名號符世禮著賞換喀勒崇依巴圖魯名號參將胡義和著賞換齊朗阿巴圖魯名號提督黃友信著賞給莽阿巴圖魯名號邱俊鳳著賞給拉禮巴圖魯名號副將張沛著賞給巴圖隆阿巴圖魯名號鄧增著賞給伊博德恩巴圖魯名號并賞加總兵銜提督張振壽著賞給健勇巴圖魯名號劉得喜著賞給捍勇巴圖魯名號遊擊李章貢著賞給赫勇巴圖魯名號都司楊錦

奏稿卷四十二

卒

棠著賞給勁勇巴圖魯名號總兵賀長發雷貴才等均著以提督總兵交軍機處記名遇有缺出請旨簡放提督陶生林著賞給頭品頂帶并賞換葉鏗額巴圖魯名號副將胡英傑等均著免補副將以總兵交軍機處記名請旨簡放參將程玉修等均著免補本班以副將儘先補用并賞加總兵銜內周國泰并賞換花翎遊擊楊金龍等均著免補本班并免補參將以副將仍畱各原省儘先補用楊金龍并賞給強勇巴圖魯名號蘇秀生并賞給振勇巴圖魯名號袁紹華著免補本班并免補參將以副將儘先補用并賞給鋒勇巴圖魯名號沈玉貴著免補遊擊并免補參將以副將畱於湖南儘先補用都司楊廷榦等均著免補都司并免補遊擊以

參將儘先補用內張得昇并賞給達勇巴圖魯名號劉長其并賞給壯勇巴圖魯名號李孝隆并賞給卓勇巴圖魯名號遊擊鄧金陵著免補本班以參將仍畱兩江補用并賞加副將銜李得勝著免補本班以參將儘先補用并賞給確勇巴圖魯名號都司蘇貴興著免補都司并免補遊擊以參將畱於河南補用并賞加副將銜彭秀文等均著免補本班以遊擊各畱原省補用彭秀文并賞給揚勇巴圖魯名號胡少亭并賞加參將銜周玉堂著免補都司以遊擊儘先補用并賞換花翎守備朱星貴著免補守備并免補都司以遊擊仍畱湖南儘先補用趙自新等均著免補守備以都司儘先拔補并賞加遊擊銜千總羅言等均著免補千總并免補

奏稿卷四十二

十一

守備以都司儘先補用熊來儀等均著免補千總以守備儘先補用并賞換花翎把總張瑞揚等均著免補本班以千總儘先補用并賞加守備銜張瑞揚并賞戴藍翎外委夏德華著免補外委并免補把總以千總儘先補用并賞戴藍翎直隸州知州武條箴等均著免選本班以知府畱於陝西歸軍功候補班前補用龍錫慶著以本班改畱甘肅歸候補班前補用并賞加知府銜知縣吳光熊著免補本班以知州仍畱山西歸軍功候補班前補用并賞換花翎袁珪齡著俟補缺後以同知歸軍功候補班前補用其餘出力員弁勇丁著准其彙案保獎歷次陣亡之遊擊陳湘林等一百三十七員均著交部分別從優議卹另片奏請將降補遊

擊之提督開復等語遊擊熊隆名此次進剿西甯疊著戰功深知
愧奮熊隆名著准其開復提督原官仍交軍機處記名簡放并賞
還勇號以昭激勸該部知道單片併發欽此

奏稿卷四十二

空

軍機大臣字寄同治十一年十一月二十日奉

上諭左宗棠豫師奏西甯解圍見籌辦情形一摺已明降諭旨宣示出力陣亡各員照請獎卹矣西甯被圍日久此次劉錦棠督軍深入立解城圍并分別安插難民降眾辦理甚妥該處久爲賊擾民不聊生一切善後事宜卽著豫師會商左宗棠悉心布置毋令失所回族結黨甚固醜類繁多仍恐有不逞之徒暗中勾結別滋事端亟應將伏莽一律埽除毋貽後患并著左宗棠豫師隨時加意防範以期綏靖地方至叛逆馬本源等帶同土匪挈眷逃遁已抵巴燕戎格豈可任其遠颺仍當設法按名弋獲明正典刑以示懲儆陝回是否仍踞西川如其逃向甘州左宗棠當飭令各軍跟蹤追剿并檄甘涼各隊迎頭兜擊就地殲除毋聽其乞撫緩師致墮賊計將此由六百里各諭令知之欽此

奏稿卷四十二

奎

軍機大臣字寄同治十一年十一月二十日奉

覆陳河州回眾蠢動情形片

同治十一年十一月十九日

再臣前欽奉九月十八日

諭旨河州回眾亦有蠢動情形倘該降眾再有反覆則是前功盡棄大局殊屬可虞左宗棠晉省後自己熟籌布置等因欽此查河州大東鄉地方素稱盜藪積匪高奉朝馬祥楊由什等於八月內造謠煽亂間出搶劫經臣軍總理營務處布政使銜前山西按察使陳湜出示鎮撫良民俾無從亂一面密拏匪類該逆計不得逞僅迫脅數百人據太子寺附近上下各處攔途劫掠九月十五六兩日民團往捕該匪抗拒接戰殺斃民團十餘人陳湜及河州鎮總兵沈玉遂等於十七日率官軍分路搜捕當經擒斬三十餘名餘眾四散連日又經回目馬占鼇率民團緝獲三十餘名馬祥亦拏解訊明正法據供高奉朝已逃竄西甯見密飭搜捕被脅之眾則已概行解散其未獲匪徒已飭地方官督馬占鼇督團密拏地方仍一律安堵如故足以仰慰

宸廑所有撫勦河州東鄉實在情形理合附片陳明伏乞

聖鑒訓示謹 奏

軍機大臣奉

旨知道了欽此

奇營被脅各弁請註銷官階摺

同治十一年十一月初九日

奏爲查明奇營潰卒案內被脅各弁請

旨敕部註銷所保官階恭摺仰祈

聖鑒事竊照奇營馬隊潰走經官軍追抵陝疆由前甘肅提臣曹克忠督軍截剿全數收撫并將變亂之路鍾字等五犯查出斬梟其王士清等九弁訊由迫脅亦經奏參革職在案茲據統領奇捷等營降補參將楊世俊查報同潰弁勇除由曹克忠正法參革外尚有胡治平等九十七弁雖係迫脅同行與甘心變亂者有別然皆忝係職官未便置之不論相應繕具清單請

旨敕部查照單開各弁將所有歷保官階概行註銷以示薄懲查

奏稿卷四十二

奎

該弁等業經曹克忠編列成營如能奮勉立功以贖前愆仍可量

求

恩澤庶功罪不至兩揜而情法亦得其平是否有當謹專摺具陳伏乞

皇太后

皇上聖鑒訓示謹 奏

軍機大臣奉

旨胡治平等歷保官階均著概行註銷該部知道單併發欽此

遵 旨另籌調度摺

同治十一年十一月十九日

奏爲遵

旨覆陳事竊

臣 欽奉

諭旨前據左宗棠奏兵力不敷分布請調宋慶一軍當諭令該提督赴甘助剿茲據鮑源深奏稱該軍駐紮河西晉省河防深資屏蔽值此冬令冰堅倉猝之間無從另調別軍填紮毅軍拔隊遠征籌辦軍裝糧運事宜亦需時日且冰雪長途行走難於迅速可否飭令稍緩西進容得另籌調度等語著卽照鮑源深所請知照該提督暫緩拔營妥籌防堵仍一面豫爲布署俟來歲春融卽行迅速前進不准藉詞耽延甘肅西甯肅州一帶攻剿情形若何見在

奏稿卷四十二

奏

毅軍暫難成行該處自應另籌調度左宗棠當斟酌軍情妥爲布置勿稍疎虞等因欽此

臣

維甘肅目前局勢西甯連獲大捷師抵

府城軍威大振土客各回竄伏西川及巴燕戎格大通縣等處哀懇收撫仍須妥籌辦理以規久遠肅州踞逆節經徐占彪疊次猛攻逼城築壘賊勢窘蹙殊常特地廣兵單未能速合長圍制其死命亟應早謀添竈庶期迅拔堅城宋慶一軍旣未克速來而事機所在又未可遷延不赴因思前甘肅提督曹克忠久役關隴戰績最多性情之侃直紀律之嚴明

臣

所素悉前於同治六年八月會

經奏調曹克忠適值患病未赴上年奉

命辦理肅州軍務曹克忠單騎入關接統淮軍將弁勇丁概非素

習而軍事又有必須從新整理者數月以來軍情驟難孚洽茲聞
准軍已奉

旨敕劉盛藻接統曹克忠行將交卸軍事隴中軍興十餘載宿將
雕零見署甘肅提督楊占鼇才足治事勇略未優屢據呈請傷疾
舉發乞准假歸臣 尚未許也甘肅提督遠駐甘州非聲威素著足
當一路之寄者不足以資鎮攝而赴戎機合無仰懇

天恩准敕曹克忠交卸准軍後迅赴蘭州於所募步隊三營內擇
其願隨西征者率以俱來其憚於西行者立予資遣到蘭州後臣
面與籌商或酌撥馬步數營歸其統帶徑赴甘州署理提篆就近
派撥馬步會攻肅州於局勢必多裨益所有遵

奏稿卷四十二

奎

旨另籌調度情形謹據實具陳伏乞

皇太后

皇上聖鑒訓示施行謹 奏

軍機大臣奉

旨另有旨欽此

偪攻肅州疊獲全勝摺

同治十一年十一月十九日

奏爲官軍偪攻肅州屢次擊退撲營悍賊疊獲全勝恭摺馳陳仰祈

聖鑒事竊提督徐占彪圍攻肅逆八月初五日以前戰狀已於九月十九日馳陳在案八月初八日黎明偵賊由北門馱運糧草徐占彪密飭總兵齊懷松守備武朝聘率馬隊夜伏潘家屯莊以待并飭總兵李洪超陳登雲千總藍明泰率步隊爲援待至日午賊仍未出收隊歷草湖灘突遇賊七八百人分兩股一循北城濠渠一出短牆徑前迎撲馬賊四五百忽由北門疾馳而出齊懷松等背湖列陣分隊迎擊李洪超率隊循渠逆上賊亦分股力拒正塵

奏稿卷四十二

奏

戰間遊擊鄭光平率小馬隊與新收歸化馬隊由南壩沙根繞衝賊右官軍合力奮進賊駭而奔各營乘勝追抵北門殲賊數十并生擒七名而返初十至十九日賊匿不出惟夜於城頭施放槍礮徐占彪飭各營靜以待之二十日辰刻北門出賊二千餘循濠下至城東分三股圍歸化三營城上連放大礮護之提督陳春萬等出隊衝殺徐占彪飭遊擊秦玉盛等以馬隊繞抄城東北角齊懷松列隊城南總兵宋賢聲黃祖福等各率隊繼至賊不敢近惟伏渠中施放叉子槍相持既久忽城西槍礮大震徐占彪飛率小隊親兵及遊擊徐春先馳往見城西之賊二千餘正偪攻河北壩民團營壘民團勢將不支徐占彪飛令遊擊陳吉陞把總熊飛鵬抄

出賊後千總侯定邦及鄭光平直攻賊前賊殊死戰熊飛鵬督隊直擣中堅賊始敗竄陳吉陞自旁橫擊之侯定邦鄭光平復繞截其歸路賊敗走官軍追逼城下城上槍石雨注始收隊還計殺賊百餘名將弁亦多帶傷者城東之賊亦經總兵龍得勝及藍明泰齊懷松等擊敗返奔守備李得宜瞥見殿後賊目卽前次乞撫之僞萬長馬俊躍馬斬之各營乘勝追殺斃賊數十名徐占彪撥副右等營勇丁助民團守壘二十一日黎明賊仍由北城濠中潛出千餘人繞城西撲新中營右哨分壘副將李玉山飭勇丁憑牆堅守俟賊撲近槍礮排轟立斃十數名賊退踞濠邊宋賢聲陳春萬馳至見另股由南濠撲正營前哨分壘擊卻之是夜徐占彪飭各

奏稿卷四十二

完

營環城南掘長濠二十二日賊復由西南濠內突出千餘名直犯新左後哨分壘提督蕭章林飭以劈山礮綫槍測準轟之斃賊數名乘勝開壁縱擊賊仍敗匿濠中是夜賊千餘人由南城各攜鋤鋤掘濠牆徐占彪率隊潛往以洋槍自後擊之大潰濠牆已被賊掘坍數丈隨飭修砌二十四五兩日城南長濠掘成七百餘丈是夜諜報有賊數百潛赴塔爾灣灣收糧徐占彪飭藍明泰率歸化馬步隊躡蹤捕勦賊正乘月搶穫官軍遽起擒之斃賊二三十名生擒七名奪駱駝九頭二十六日賊千餘由城西禮拜寺偪攻新中兩營城上齊施槍礮徐占彪一面督軍修濠一面調徐春先及千總王岐山助守各壘慶戰數時賊始敗遁城西禮拜寺有踞賊

數百見長濠修近中渠礙其出入是夜於渠西築二卡相抗二十七日夜徐占彪率壯士襲賊卡各攜麥草填濠殺入賊驚覺狂竄斃賊數十名生擒三名遂焚其卡二十八日城東南西三面俱出零賊伏濠放槍并於城西增修二卡較前高堅徐占彪慮其夜擾調新左營右哨均填紮前哨壘中是夜悍賊二千餘直攻新左營勢甚兇猛總兵張成義及蕭章林環施槍礮賊三伏三起撲及營門蕭章林挺矛奮刺斃賊十餘名賊稍卻徐占彪率各營分道馳援忽大風揚塵賊又子槍不能施放官軍大呼斫陣賊勢披靡屍橫里許生擒十一名訊據擒賊馬六兒供稱是役共斃賊四百餘名內千長萬長共十餘名此八月初六至二十九日擊賊連勝實

奏稿卷四十二

七

在情形也九月初一日賊伏西南城下開槍又於城上放九節大礮忽斷忽續徐占彪見賊不出戰惟攢聚城濠覺其有異率親兵潛赴城南時城上寂無人聲循濠而西見溝中新開地洞二處深甫五六尺旋入黃草渠又見渠中一洞正對新左營壘深至五丈有奇徐占彪飭蕭章林張成義等亦深掘營濠當之初二日營濠已掘至二丈許忽黃草渠黑煙突起有聲如雷昏霧中見渠中伏賊紛紛爬濠亂竄不喻其故趨視渠中始知賊失火引然所安火器轟坍地洞洞中之賊焚斃無數初三夜賊潛出城南偷掘濠牆火光如螢倏忽隱見哨長鄧洪貴暗排槍礮以待俟賊逼近槍礮併發比敗賊回竄踰溝徐占彪已率隊馳至夾擊斃賊遂多自九

月初三以後至二十三日賊雖零星偷撲營濠人數無多知屢挫之後兇燄衰矣二十四日賊復分兩股出撲新中兩營眾約三四千又以馬賊五六百排列黃草壩徐占彪飛調副將桂錫楨及秦玉盛藍明泰各率所部迎擊馬賊飭李洪超陳登雲攻其左路親率小隊及徐春先宋賢聲等攻其右路秦玉盛等揮隊直前馬賊亦拌死力拒哨官樊振海怒馬斫陣銳不可當藍明泰復以健騎襲攻賊後賊隊大亂各軍譁噪追逐徑抵北門殺賊數十而奪其馬右路之賊已偏新中營濠徐春先自後擊之賊回拒約一時許李玉山知賊勢已竭開壁夾擊賊仍敗走左路之賊經總兵康得勝副將吳占勝分途接戰賊敗伏河邊以又子槍連環施放有賊

奏稿卷四十二

五

目執旂噉黨鏖鬪降賊認爲馬尒元帥吳占勝率壯士挺矛大呼陷陣伏賊爭起攢刺吳占勝手刃馬尒元帥而奪其旂餘賊駭奔徐占彪合隊揜殺賊敗入卡副將蕭蘭玉躡追直薄賊卡賊復卻退徐春先順渠抄之計共斬悍賊二百餘生擒七名奪戰馬五百刀械尤夥二十八日秦玉盛率馬隊赴城北巡哨適騎賊二三百向西疾馳秦玉盛繞前截擊賊仍回城糾城賊復出桂錫楨等率隊繼至擊卻之二十九日馬步賊千餘順草湖而下徐占彪列陣以待比賊偏近飭桂錫楨抄其後秦玉盛攻其前賊依廢堡分股穩抗徐占彪伺其稍懈親率精銳橫攻之馬賊先逸步賊四潰追殺百餘名生擒四十七名奪獲馬械極多此九月二十四至二十

九日擊敗撲營悍逆并陣斬賊目實在情形也臣維肅逆被圍日久窘蹙殊常希圖攻撲牆濠潰圍鼠竄均經徐占彪擊卻卒不得遲惟地闊兵單未能合圍制其死命容俟增派勁旅多畀攻具以期速拔堅城所有肅州疊獲全勝情形謹據實馳陳伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十二

三

河南協餉請改爲毅軍運費片

同治十一年十一月十九日

再宋慶一軍係照豫省餉章每勇丁一名月支銀三兩此外雖稍有津貼聞亦無多惟柰神木一帶與邊外蒙地緊接該處地沃產饒牛犏連獲豐稔糧價既賤牲畜又多以故採糧轉運勞費較省豫餉雖薄尙資敷衍茲奉

諭旨敕俟來歲春融卽行前進竊恐隴中糧運艱阻十倍神木或滯師行而軍餉項積欠太多又復無從挹注再四思維惟有將部撥河南月協軍餉銀一萬五千兩改爲毅軍運費在豫省無事另籌而該軍得資津貼如蒙

兪允應請

奏稿卷四十二

壹

旨敕下河南撫臣除將同治十二年正月以前協餉仍籌解軍外自同治十二年二月初一日爲始應協軍月餉銀一萬五千兩同毅軍月餉按月併解宋慶行營以利師行而示體恤是否有當謹附片具陳伏乞

聖鑒訓示謹

奏

軍機大臣奉

旨另有旨欽此

河南協餉請改爲毅軍運費片
同治十一年十一月十九日
再宋慶一軍係照豫省餉章每勇丁一名月支銀三兩此外雖稍有津貼聞亦無多惟柰神木一帶與邊外蒙地緊接該處地沃產饒牛犏連獲豐稔糧價既賤牲畜又多以故採糧轉運勞費較省豫餉雖薄尙資敷衍茲奉
諭旨敕俟來歲春融卽行前進竊恐隴中糧運艱阻十倍神木或滯師行而軍餉項積欠太多又復無從挹注再四思維惟有將部撥河南月協軍餉銀一萬五千兩改爲毅軍運費在豫省無事另籌而該軍得資津貼如蒙
兪允應請
奏稿卷四十二
壹

軍機大臣字寄同治十一年十二月初一日奉

上諭左宗棠奏另籌調度情形暨官軍偪攻肅城疊獲勝仗各一摺覽奏均悉西甯土客各回竄伏西川及巴燕戎格大通等處窮蹙乞撫肅州踞逆亦經徐占彪疊次猛攻偪城而壘惟肅城地廣兵單未能速合長圍制賊死命卽著左宗棠飭令徐占彪就見有兵勇穩慎以圖一面添派勁旅併力進攻金順於九月中旬自甯夏拔隊西進疊諭到肅後會合徐占彪一軍力拔堅城刻下計早抵肅西川等處乞撫回眾并著妥籌辦理毋稍疎虞該大臣以兵力不敷請飭曹克忠赴甘助剿卽著邵亨豫傳知曹克忠於交卸後迅速馳赴蘭州聽候左宗棠調遣其所募步隊三營并令慎加選擇或分別資遣勿任滋事至曹克忠抵甘後應如何撥營歸其統帶及該提督應赴何處駐紮并著左宗棠斟酌情形奏明辦理穆圖善當懷遵疊次諭旨扼紮平涼固原一帶以爲甘省後路聲援毋得逗畱西安省城宋慶一軍本日已令定安傳知該提督開正卽整隊西行另片奏請飭將河南應解西征月餉改撥宋慶軍營等語已諭令錢鼎銘照辦矣將此由五百里各諭令知之欽此

奏稿卷四十二

書

圍勦肅逆擊退撲營悍賊并添兵助攻摺

同治十一年十月十四日

奏爲官軍圍勦肅逆屢次擊退撲營悍賊疊獲全勝并添調勁旅助攻情形恭摺馳陳仰祈

聖鑒事竊提督徐占彪九月二十九日以前偪攻肅州捷狀業於十一月十九日馳陳在案十月初九日城逆出馬步三四千踰東草湖圍撲新後營徐占彪飭提督黃虎臣等分兩路包抄親率馬隊截其歸路賊正麇聚新後營外填濠猛進總兵康得勝憑牆力禦見援兵包近卽開壁出戰內外夾攻賊且戰且退將及湖邊城中復出援賊千餘合力穩抗徐占彪飭長矛隊伏身猱進賊槍礮排發均於煙霧中鼓銳攢刺賊亦短刃相接黃虎臣振臂奮戈突

奏稿卷四十二

壹

入賊中立殪執旂賊目一名賊隊大亂槍礮隊乘勢轟擊斬馘二百餘名追抵城濠而返據擒賊供稱賊目馬尔元帥及口外纏頭馬元帥均經陣斬萬長高臺老二馬得鎮亦受重傷十月十六日馬步賊三千餘由老關出撲總兵陳登雲新後營左哨分壘徐占彪聞報率親兵馬隊往援飛飭各軍分路抄擊賊亦分隊伏地列又子槍千餘杆左右施放官軍各出劈山礮連環轟擊斃賊甚多賊退踞東城外廢垣中仍施槍礮抵拒徐占彪飛調副將蕭蘭玉等昇開花礮向賊多處點放礮子斃賊尤眾賊敗退追斬數十名十七日馬步賊三千餘出南稍門繞越長濠圍攻提督蕭章林新左營壘官軍分四路馳勦賊知不敵退踞沙埂濠畔密排又子槍

施放復經官軍槍礮及開花礮擊斃多名遁去十八日黎明北稍門出馬步賊千餘撲陳登雲新後營壘南稍門出步賊三千餘撲千總藍明泰歸化營壘徐占彪飛率親兵及小馬隊至新左營墩上瞭見賊勢凶猛步賊兩路繞出新後歸化兩營之間馬賊列東北爲援背城而陣其地廢牆甚多賊伏其間發槍狙擊非設法誘出不能痛剿乃飭總兵李洪超率右營蕭章林率新左營由四壩衝出賊整隊迎拒李洪超等佯遁入壩賊果乘勢猛追李洪超等俟賊離壩已遠回擊其前總兵宋賢聲遊擊徐春先及藍明泰擊其左遊擊秦玉盛守備武朝聘擊其右徐占彪率總兵齊懷松繞截其後賊知中計分隊力敵拚死衝突官軍鼓銳環攻刀斫矛刺

奏稿卷四十二

美

殲斃數十名賊大敗由東面草湖分竄馬陷於淖者數十悉殲之生擒馬得海等四名訊據供稱連日出戰賊中千萬長傷亡極多賊首馬四挑悍賊出戰不虞仍敗也此後賊仍匿不出二十八日徐占彪率隊赴南稍門修築礮臺并於東城新募正前營壘畔添修墩卡二座賊由南稍門出馬步賊三四千排列城下徐占彪飛調各營環剿賊循城東縮退入城是夜四更西城出賊千餘入黃草渠中又有千餘賊踰黃草渠藏廢堡中西城禮拜寺及廢堡中俱有賊潛入徐占彪飭各營嚴陣以待二十九日黎明黃草壩有馬賊六七百由大路馳至徐占彪率隊迎擊賊甫交鋒卽敗徐占彪按隊不追賊復回擊官軍禦之賊又敗往返五六次賊漸撲漸

近已抵劉家堡徐春先等分兩路抄之徐占彪迎頭猛擊賊三面受敵伏賊相去又遠遂折向黃草壩狂奔武朝聘等截之殺賊甚多時禮拜寺伏賊爲秦玉盛等擊敗黃草渠伏賊亦爲蕭章林及總兵黃祖福擊敗廢堡中伏賊爲宋賢聲蕭蘭玉擊敗賊勢披靡悉踰西城濠而去是役殺賊數百名生擒悍賊張添福安阿喜等十名訊據供稱前賊目王大漢因糧缺已帶馬賊三百餘乘夜潛竄出關其餘土回惶懼欲逃均因家累不果此十月三十日以前擊敗撲營悍賊實在情形也臣維該逆困踞孤城糧缺援絕勢已坐困然決無束手待盡之理急需增調生力馬步併勢助攻速期戡定十一月二十七日飭提督陶生林副將方友升馮桂增帶所

奏稿卷四十二

七

部馬隊三營提督金慶元總兵戴宏勝步隊二營并添守備陳文英率礮隊護解後膛大礮赴肅均歸徐占彪節制調遣以一事權其金順一軍函稱已由涼州開拔前進是否到在陶生林等之先容俟續報所有官軍攻勦肅城踞逆獲勝增兵前往情形謹據實馳陳伏乞

皇太后

皇上聖鑒訓示謹 奏

軍機大臣奉

旨另有旨欽此

西甯解圍後辦理情形片

同治十一年十一月十四日

再西甯解圍後土客各回目互相猜貳紛紛乞撫劉錦棠遵臣歷次示諭飭令先將所有馬匹槍械悉數分日呈繳然後言撫計西甯縣屬已繳馬一千六百餘匹槍矛四千餘枝大通縣屬已繳馬五百餘匹槍矛一千餘枝其觀音堂溝土回則令赴統領安西軍提督劉明燈行營就近呈繳亦據報收馬數百匹槍械千餘件陝回崔三等土回冶福興馬福壽等皆款營獻良馬自限按日追繳馬械彼俗所謂拉馬投誠者也其西甯城關各回民隨馬本源馬桂源遁巴燕戎格者劉錦棠飭回目馬永福往招之計陸續逃歸復業者三千數百名感官軍不殺不擾之德放膽來投者尙絡繹

奏稿卷四十二

天

於道馬桂源等見黨夥已離赴劉明燈處遞呈言爲西北川回民所誤意爲脫罪求免地步蓋以臣購捕告示中有解營訊辦一語也馬永福在西甯回目中最高稱樸愿本馬本源之堂叔馬本源等糾陝回叛亂馬永福在城助官民守禦甚力其子馬德源卽馬三娃爲彼教之海裏飛素兇狡馬永福不能制至是因促馬本源等速歸就撫又爲馬本源等所殺馬本源兄弟旣殺馬德源爲其族眾所不容據河回馬占鼇馬永瑞等密稟陳湜見糾約入工撒拉回眾截其入撒拉之路陳湜已與劉錦棠密商辦法不容其深入番地也大抵回性多疑善詐似點實愚其用心有非尋常意料所及者辦理之法不可稍涉迂緩致失事機亦不可操之太蹙令其

疑畏察看劉錦棠陳湜皆深識此意臣惟有專其委任責其成功
務求數百年之安不敢夸近功而忘遠大也謹附片陳明伏乞
聖鑒訓示謹 奏

軍機大臣奉

旨另有旨欽此

奏稿卷四十二

堯

軍機大臣字寄同治十一年十二月二十六日奉

上諭左宗棠奏官軍剿擊肅逆屢獲勝仗暨西甯土客回目乞撫見在辦理情形各摺片肅州回逆困蹶孤城屢次出撲官軍營盤經徐占彪奮勇擊退惟城中悍賊尙多困獸猶鬪允宜穩慎進取迅拔堅城該大臣見已添派陶生林等營前赴肅州交徐占彪節制調遣金順一軍計期亦應到肅卽著左宗棠飭令徐占彪會同金順乘此聲威迅圖攻拔以竟全功西甯土客各回呈繳馬匹槍械紛紛乞撫并著飭令劉錦棠等妥爲辦理毋稍疎虞逆首馬本源馬桂源逃遁巴燕戎格因黨與已離亦思投誠免罪該逆等狡詐性成恐以乞撫懈我軍心萬一逃入番地則捕獲尤難仍著飭令劉明燈陳湜劉錦棠等妥慎籌辦無論是否就撫總以捕獲爲要不可稍涉迂緩致誤事機將此由六百里諭令知之欽此

涼州白楊墩湖勦賊獲勝片

同治十一年十一月十四日

再涼州府永昌縣毗連邊疆其沙窩白楊墩湖等處時有伏匪伺隙出擾十月二十二日涼州副都統額爾慶額聞武威縣屬陳春堡有警率隊馳往將近白楊墩湖有馬賊七八十騎徑前迎撲額爾慶額麾馬隊擊之賊屢卻屢進官軍迅奮壓勦賊始敗奔追二十餘里生擒一名斬十餘名忽有另股馬賊百餘騎由青山竄出敗賊亦合股回鬪額爾慶額派佐領存祥分隊力擊鏖戰三時適官軍步隊繼至繞截賊後賊乃大奔追歷十餘里生擒二名斬三十餘名槍斃紅衣賊一名奪獲紅旂一面槍礮刀矛牲畜甚夥救出被擄男婦十三名所有白楊墩湖勦賊獲勝情形理合附片陳

奏稿卷四十一

全

明伏乞

聖鑒謹 奏

軍機大臣奉

旨知道了欽此

武職大員苛斂捐輸誣民爲逆縱兵攻堡請

旨察辦摺

同治十一年十

二月十九日

奏爲武職大員苛斂捐輸誣民爲逆縱兵攻堡冤斃二百餘命應

請

旨察辦以雪沈冤仰祈

聖鑒事竊同治九年閏十月臣於平涼營次准烏魯木齊提督成祿咨送會奏聚眾抗糧派兵剿捕摺稿臣以未據地方官稟報不敢附和仍將原稿移還維時西路梗阻聲息不通無從訪察十年正月准吏部咨內閣鈔出烏魯木齊提督成祿奏稱高臺縣屬西鄉瓦壩有貢生馬吉貞生員李載寬趙席珍民人傅泳開胡正邦

奏稿卷四十二

全

等於五月間商同倡謀借抗糧爲名煽惑鄉愚斂錢聚眾當委寶型會同秦惠鈞管筮前往捕拏將逆犯李載寬胡正邦傅泳開趙席珍生擒馬吉貞率黨二百餘人悉被格殺其餘數百紛紛逃逸將李載寬等四名訊明後卽行正法地方一律肅清陣亡之把總仲瑞林周得勝外委王有年應請交部議卹查前署知縣管筮於六月初九日交卸見署知縣秦惠鈞卽於是日接印於該匪潛謀起事覺察後均卽隨同剿捕首犯悉數就獲應請免其查議一摺於同治九年九月二十三日奉

旨著照所請該部知道欽此欽遵到部除武職議卹之處應由兵部辦理外此案前署高臺縣知縣管筮於六月初九日交卸見署

知縣秦惠鈞卽於是日接印於該匪馬吉貞等潛謀起事覺察後均卽隨同鞠捕首犯悉數就獲據該提督奏請免其查議奉

旨著照所請相應移咨該督欽遵辦理至貢生馬吉貞生員李載寬趙席珍聚眾謀逆失察之該管教官例有處分應移咨該督查取職名送部查議可也等因臣當行局飭司查明詳辦十一年六月據署高臺縣知縣徐應魁詳覆查取失察生員謀逆之教官職名一案准高臺縣教諭雷啟甲稟稱成提督自同治四年駐紮高臺歲按額徵攤捐糧料秣草煤炭油燭以及年節犒賞截至九年春間計捐輸倉斗糧十餘萬石捐錢約十萬串合銀不下三十萬兩而賊蹤紛紛竄擾兵不出城署高臺縣事靈臺縣知縣管笙於

奏稿卷四十二

三

按畝攤捐外加派富戶捐輸分上中下三等捐繳各鄉士民赴城具訴求免守城兵役不放入城各鄉士民寄寓近城十餘里權家圍莊守候批示仍遣數人入城呈訴成提督飭護安肅道寶型改委秦惠鈞署縣印追比益急該士民仍無捐可繳成提督突發兵圍捕七月二十四日攻破權家圍莊將該主客各士民及老幼婦女概行屠戮并擒生員李載寬趙席珍等正法時肅州有秀才在權家圍莊教館塾中學童十餘人亦均被殺茲奉文查取教官失察生員謀逆職名可否邀免等情前來臣當密飭署甘涼道蕭宗幹委員確查并行提管笙來省察訊旋據蕭宗幹稟覆委員府經歷劉懷殷查取民人胡生春等供結與該教諭雷啟甲所稱大致

相同本年十二月間管筮到省投案發交臬司訊問據供奉成提督札委借捐仍按額糧攤派適秋禾被凍各鄉士民來城申訴會據情稟知轉觸成提督之怒改委秦惠鈞接署縣印該士民僉稱俟成祿出關時再捐裹帶成提督忽發兵攻破其莊悉數殺害實未聞該士民有謀叛情事又據前代理撫彝通判王佳植稟亦稱高臺戶民聚眾係爲求減捐輸起見與撫彝不相干涉不敢附和妄稟臣維甘涼一帶民風向稱樸厚軍興以來各軍營勒派捐輸糧料草束勒派車輛駝隻無不悉索供支爲時既久筋疲力盡卽如高臺一縣捐輸成祿各項合銀已三十萬兩以一隅之地勉供坐食客軍者亦旣數年在東南饒沃地方已爲罕見何況沙磧高

奏稿卷四十二

禽

寒歲只一收之地乎地方額徵之糧歲有常數偶值災歉尙且蒙恩蠲緩何況高臺常被賊擾又正秋禾歉收之際乎且士民赴營申訴求減捐輸本非額賦并有俟官軍出關再捐裹帶之請其情亦極可憐成祿一軍旣有專餉人馬又不足數賊蹤擾攘并無一矢加遺於隔轄境土坐食數年猶嫌不足災歉之後仍須如數取盈迨四鄉士民赴營申訴尤復指爲聚眾抗糧誣爲叛逆并將寄寓之權家圍莊圍定掩捕并無辜老幼婦女及避難之肅州人民概行屠戮淨盡猶且虛報勝仗籲請獎紱此實稍有人心者所不忍爲亦軍興以來所僅見臣旣察訊得實若壅於上聞何顏立於人世合無仰懇

敕下六部九卿會議烏魯木齊提督成祿應得之罪以雪沈冤而彰公道至前撫彝通判王佳植未肯附和情尚可原應請

旨免其置議前署高臺縣知縣秦惠鈞護安肅道寶璽助虐殃民復同圍權家圍莊肆行屠戮意在迎合取容昧良喪恥見均身死法無可加自毋庸議前署高臺縣知縣管筮於捐派征糧外復議加捐上中下三等各戶致四鄉士民紛紛赴營申訴竟遭此劫雖旋以辦捐不力觸成祿之怒飭令交卸未及施行并據面稟實未會攻權家圍莊尙屬可信而意在迎合實此案肇衅之人未敢輕縱應請

旨革職監禁俟此案定讞時照律科罪至生員李載寬趙席珍馬

奏稿卷四十二

奎

吉貞等因赴營申訴求減捐輸冤被抗糧叛逆之名與權家圍莊無辜土客民人橫被屠戮均應予以昭雪以廣

皇仁而彰公道其失察生員叛逆之高臺縣教諭雷啟甲并請敕部免議是否有當謹專摺具陳伏乞

皇太后

皇上聖鑒訓示施行謹 奏

同治十二年正月二十一日奉

上諭前據左宗棠奏參成祿糜餉遷延舉動乖張各款當諭穆圖善密查具奏嗣據穆圖善查明該提督不知檢束參款均屬有因本當治以應得之罪因念成祿業經出關所部乏人接統是以尚

未降旨本日據左宗棠奏成祿在高臺時苛斂捐輸誣民爲逆縱兵冤斃多命所犯情節重大斷難一日姑容已密諭金順傳旨將成祿革職拏問解京治罪矣關外距京寫遠解送務須嚴密除由金順派員押解外著左宗棠多派得力員弁沿途護解并飭經過地方官接續遞解前進不得稍涉疏虞前署高臺縣知縣管笙著左宗棠一併派員押解來京質證毋任成祿得以狡展至金順所部兵勇或調赴前敵或分紮後路軍糧關繫要左宗棠務當隨時妥籌接濟毋令缺乏一切運送軍糧軍火并檄飭地方官勿得稍分畛域肅州軍務卽責成徐占彪等認真勦辦迅掃逆氛如須添撥兵勇卽著酌量調派以資得力所請將通判王佳植等免議生員李載寬等昭雪之處俟定案時一併降旨將此由六百里密諭知之欽此

總兵魏紀鑿等招撫零匪被害請

卹片

同治十一年十一月十九日

再陝北逆蹤除殆盡僅餘漏網之羅三朝馬正榮各零股數十騎此擊彼竄飄忽異常管帶武威前營總兵魏紀鑿七月內疊據撫回馬義才堅稱伊姪馬正榮急於求撫心懷疑懼請前往收撫等情魏紀鑿卽率弁勇數名帶同馬義才及撫回陝得榮前往七月三十日行經定邊四合原地方適遇羅三朝馬正榮等合股竄至魏紀鑿推誠開導羅三朝見魏紀鑿隨身并無隊伍頓起殺機魏紀鑿知賊情有變卽挺矛擊刺格斃數賊究因眾寡不敵力竭陣亡弁將楊石泰等亦同時戰歿羅三朝以撫回陝得榮爲同教甘言誘之陝得榮大罵不屈旋即被害嗣陝西提臣雷正綰派隊

奏稿卷四十二

七

兜剿東山零匪生擒羅三朝及其死黨馬海受馬海明三犯解交平慶涇道魏光燾驗訊明確懲處臣飭魏光燾并提給稱求撫之馬義才一犯均訊明磔誅以雪忠憤竊惟魏紀鑿素稱驍勇深明戰略同治六年隨臣入關委帶中營馬隊隨征陝西雲巖鎮董志原等處歷著戰功復攻克保安縣屬老巖窰擒斬首逆袁大魁嗣委帶武威前營剿賊環慶兩川及韓蒲邠高等處肅清鹽固兩山游匪生擒逆首李百寬等多名厥功尤偉茲以零匪求撫急於見功致被戕害實堪憫惜合無仰懇

天恩俯准將總兵魏紀鑿照總兵陣亡例

賜卹同時遇害花翎雷陝甘補用參將楊石泰花翎都司喬秉祥

藍翎都司蕭國才藍翎千總陳明道把總瞿正魁五名并懇
敕部照例議卹以慰忠魂謹附片具陳伏乞

聖鑒訓示施行謹 奏

軍機大臣奉

旨魏紀鑿等均著照所請交部分別議卹欽此

奏稿卷四十二

全

